

S4

Imbumbanyigisho y'Ikinyarwanda

Ikibonezamvugo n'ubuvanganzo



IYAMUREMYE Alexis

GS KAGAMBA (0781067392)

{ A }

IBIRIMO

IBIRIMO	i
Umutwe wa 1: Umuco nyarwanda	1
Ingeri z’ubuvanganzo nyarwanda bwo muri rubanda	1
Umugani muremure n’uturango twawo	1
Insigamigani	2
Ibitekerezo byo muri rubanda	3
Imigani y’imigenurano	4
1.11. Ibisakuzo	5
1.13. Ibisingizo.....	6
Ibyivugo by’amahomvu.....	6
IBINDI Ku buvanganzo bwo muri rubanda	6
Umwandiko ntekerezo	10
Izina mbonera gakondo	11
Umutwe 2: Umuco w’amahoro	14
Ntera	14
Izina ntera	16
Igisantero	18
Umutwe wa 3: Uburinganire n’ubwuzuzanye	20
3.2. Ibiganiro mpaka	20
3.3. Imyandikire yemewe y’Ikinyarwanda	22
1. Imyandikire y’inyajwi	22
2. Imyandikire y’ ingombajwi shingiro	23
3. Inyuguti zandika ingombajwi z’ibihekane:.....	23
Gukata	24
5. Amagambo afatana n’adafatana	25
6. Imyandikire y’amazina bwite	28
7. Imikoreshereze y’utwatuzo n’ibimenyetso byihariye Utwatuzo	29
8. Imikoreshereze y’inyuguti nkuru	31
Umutwe wa 4: Kubungabunga ubuzima	34
Imiterere y’amasaku ku magambo	34
Amoko y’amasaku	35
4.3. Ubutinde n’imiterere y’amasaku mu nteruro	37
Amasaku mbonezanteruro	37
Umutwe wa 5: Kubungabunga Ibidukikije	39
Ikomorazina mvazina	39

Inzira z’ikomorazina mvazina	39
Amoko y’imyandiko.....	42
1. Umwandiko ntekerezo	42
2. Umwandiko mbarankuru.....	44
3. Umwandiko mvugamiterere	46
4. Umwandiko mvugamateka.....	46
5. Umwandiko nsesengurabumenyi.....	47
Umutwe wa 6: Iterambere.....	48
Indirimbo	49
Ikomorazina mvanshinga	54
Umutwe wa 7: Imiturire.....	57
7.4. Uburyo bw’inshinga itondaguye.....	60
Umutwe wa 8 : Ikoranabuhanga.....	62
Amagambo adahinduka	62
1. Imigereka	62
2. Indangahantu.....	64
4. Ibyungo	65
5. Utumamo.....	68
6. Ibyegeranshinga.....	69
7. Amarangamutima.....	70
8.4. Inkuru y’ikinyamakuru.....	72
Umutwe wa 9: Ububi bw’ibiyobyabwenge	74
Inkuru ishushanyije.....	74
Iyiganteruro: Ibice by’interuro.....	76
1. Ruhamwa na ruhamya	76
2. icyuzuzo	77
Umutwe 10: Uburezi n’uburere	79
Iyiganteruro.....	79
Isanisha	79
Imimaro y’amagambo mu nteruro yoroheje	84
<input type="checkbox"/> Imfutuzi.....	85
<input type="checkbox"/> Impuza.....	85
3. Interuro yoroheje.....	86
Inyandiko n’ibitabo byifashishijwe.....	87

Umutwe wa mbere

Umutwe wa 1: Umuco nyarwanda

Ingeri z'ubuvanganzo nyarwanda bwo muri rubanda

Ikibazo:

Umaze gusoma umugani “Akamaro k'ineza” urasanga umugani muremure uri mu buhe bwoko bw'ubuvanganzo? Kubera iki?

a) Inshoza y'ubuvanganzo bwo muri rubanda

Ubuvinganzo ni iki?

Inganzo ni ahantu ubundi bakura ibumba bakoresha mu kubumba inkono n'ibindi bikoreho bikoze mu ibumba. Kera umuhanzi yajyaga mu mwiherero akavayo azanye igihangano, akaba ari byo bita ko avuye mu nganzo.

Bityo ubuvanganzo bwo muri rubanda ni ubuvanganzo nyemvugo bukubiyemo ubuhanzi bwamamaye muri rubanda, ubuhanzi bworoshye umunyarwanda abasha kumva no gusobanukirwa. Imvugo yabwo ntihanitse, buri wese yabashaga kuyumva.

b) Ingeri z'ubuvanganzo bwo muri rubanda

Mu ngeri z'ubuvanganzo nyemvugo bwo muri rubanda twavugamo:

Imigani miremire, insigamigani, imigani migufi cyangwa imigenurano, indahiro, ibitekerezo bya rubanda, ibisakuzo, ibyivugo by'amahomvu, amahamba, amahigi, amasare (indirimo z'abasare), amagorane, ibitongerero (mu kuragura, guterekera, kuvura, kugombora...), indirimo z'imandwa, imbyino, ibihozo (iby'abana n'iby'abageni), ibyidogo by'abahinzi b'ubudehe cyangwa abandi bantu bitabiriye umurimo wa rusange... Turagerageza kuvuga kuri zimwe muri izi ngeri nk'imigani miremire, insigamigani, ibitekerezo byo muri rubanda, imigani migufi, ibisakuzo, ibisingizo n'ibyivugo by'amahomvu.

Umugani muremure n'uturango twawo

Inshoza y'umugani muremure

Tugendeye ku bivugwa mu mugani, dusanga umugani muremure ari igihangano giteye nk'inkuru yiganjemoamakabyankuru. Umugani ufatira ku bifatika n'ibidafatika: Abantu, ibintu, ibikoko, imyururu, Imana, urupfu, umuyaga, ubunyerere n'ibindi. Umugani “Akamaro k'ineza” urimo abantu: Nyiragahinda, umwami, ... amatungo : inka, inyoni (akanyamanza). Akenshi umugani ubara ibidashoboka mu buzima busanzwe, nko kuvugisha ibitavuga. Nko muri uyu mugani akanyamanza karavuga, inka zanga kurisha, gukamwa ... kubera ko zabuze ukunda kuzigirira neza, ziritwara nk'izizi ubwenge.

Umugani nubwo uhera ku nkuru zitabayeho, uba ugamiye kwigisha gukora igikwiye cyangwa gukosora amakosa y'imyitwaririre y'abagize umuryango uyu n'uyu. Ni yo mpamvu bavuga ngo: "Umugani ugana akariho". Umugani "Akamaro k'ineza", urigisha kugira neza, "ugira neza ineza ukayisanga imbere", ukanenga kugira nabi no kugira ishyari. Umwadiko "Akamaro k'ineza" ni umugani muremure.

Uturango tw'umugani muremure

Iyo tugendeye ku miterere, tubona ko umugani muremure utangirwa na kera habayeho cyangwa umunsi umwe, ugasozwa na si ge wahera. Ubusanzwe hari amagambo yo gushitura abantu ngo bagutege amatwi, utangire umugani nta n'umwe urangaye. Bene aya magambo abimburira umugani nyiri izina ari ubwoko bwinshi, turafata uruger rumwe aho batangira bagira bati: "*Mbacire umugani, mbabambuze umugani, n'uzava I Kantarange azasange ubukombe bw'umugani bumanitse ku muganda w'inzu.*"

Ubusa bwariye ku manga, umuyaga urabwarurira, agaca karacuranga, uruvu ruravugiriza, nyiramusambi isabagirira inanga. Akabuye kibiritse kajya epfo, nibirika njya ruguru, imbwa iti: "*Mbwee!*" Nti: "*Gapfe*". Inka iti: "*Mbaa!*" Nti: "*Kura dukurane mwana w'Imana*". Harabaye ntihakabe, harapfuye ntihakapfe, hapfuye imbwa n'imbeba, hasigaye inka n'ingoma."

Kubera ko imigani bayicaga nijoro, hari igihe abantu bageraga aho bagashaka gusinzira. Mu rwego rwokubakangura, imigani imwe bayihagikamo uduka turirimbwa. Mu mugani "Akamaro k'ineza" akanyamanza karirimba kagira kati: "*Inka zanze kunywa zabuze Nyiragahinda, inka zanze gukamwa zabuze Nyiragahinda, inka zanze izazo zabuze Nyiragahinda*". Kubwira cyangwa kubarira abandi umugani babyita "guca umugani". Umuntu uca umugani bamwita "gacamigani".

Insigamigani

a) Inshoza y'insigamigani

Insigamigani ni imwe mu ngeri z'ubuvanganzo nyarwanda bwa rubanda, zikaba zaragaragariraga cyane, mu mivugire, mu migendere, mu myumvire, mu mikorere no mu mibereho y'ubuzima bw'Abanyarwanda bwa buri munsi. Insigamigani ni ahantu cyangwa se abantu babaye abagenuzi b'imigani ubwabo cyangwa se inkomoko yayo. Kimwe n'ibindi rubanda bagenuriyeho, bakabigira iciro ry'imigani, nk'inyamaswa, inyoni, imyururu n'ibindi. Aha ni ho hava izina "IBIRARI BY'INSIGAMIGANI". Bikaba bishaka kuvuga, inkora y'aho ikintu cyanyuze kigana aha n'aha, bikaba kandi bivuga amayira abakomotseho amagambo yabaye umugani banyuzemo igihe iki n'iki, ku buryo ubu n'ubu, byagenze bitya na bitya.

b) Ingeri z'insigamigani

Insigamigani zigabanyijemo ingeri ebyiri:

Hariho insigamigani nyirizina: Ni iz'abantu bazwi neza amavu n'amajyo, ku buryo rubanda bemeye kwigana imigirire yabo no mu mvugo isanzwe igakoreshwa, bigahinduka inyigisho y'ihame. Dore nka Mbehe abura uko acira abavandimwe be urubanza akaruka nabi agira ati: "Uyu akwiye gupfa cyangwa gukizwa", maze babona umuntu uciye urubanza mu mafuti bakavuga ngo "yaciye urwa mbehe". Nka Nyiramataza muka Rukari ati: "Ngiye kwa Ngara". Kuri Bajeyi ba Sharangabo bati: "Yarezwe Bajeyi". Rugaju rwa Mutimbo ati: "Nguye mu Matsa"! ...Mbehe, Ngara na Bajeyi babaye imvano y'imigani, na ho Nyiramataza na Rugaju rwa Mutimbo babaye abagenuzi b'imigani.

Hakabaho n'insigamigani nyitiriro: Ni izo ibindi rubanda bagenuriyeho bikaba iciro ry'imigani, mbese nk'impyisi mu nyamaswa iti: "Harya ko kuvuga ari ugutaruka, nk'iriya Musheru ipfana iki na Mutamu"? Nk'inyombya mu nyoni yahagaze mu itongo rya Rugaju iti: "Mbatere akari aha"! Nk'igikeri

mu myururu, bati: “Gikeri utahye n’intashya”, kiti: “Mfana iki n’ibiguruka”? Burya ibyo byose uko ari bitatu, babitwerereye amagambo y’abantu bahishiriye kubera umwanya bafite mu Gihugu cyangwa se mu muryango wubashywe. Si byo ubwabyo byivugiyeye ayo magambo.

C) Imirangururire y’insigamigani

Barangurura ibirari by’insigamigani, bagaragaza inkora naka yanyuzemo ubwe, cyangwa iyo Gacamigani we yahimbiye kunyuzamo ikindi yitiriye amageza yavuyemo umugani bati: “Umugani uyu n’uyu wakomotse kuri naka na kanaka cyangwa se na nyiranaka”.

d) Itandukaniro hagati y’umugani muremure n’insigamugani

Umugani uvuga ibintu bitabayeho ugamiye kwigisha kandi ugakoresha amakabyankuru. Ngo umugani ugana akariho. Batangira umugani bavuga ngo kera habayeho, bagasozza bavuga ngo si ge wahera. Mu gihe insigamugani yo itangira ivuga igihe runaka kizwi, abavugwa akaba ari abantu bazwi cyangwa se imyitwarire batsindira ibindi biremwa ariko bashaka kuvuga ibibaho mu mibanire y’abantu.

Ibitekerezo byo muri rubanda

a) Inshoza y’ibitekerezo byo muri rubanda

Ibitekerezo byo muri rubanda ni imwe mu ngeri z’ubuvanganzo nyarwanda nyemvugo bwo muri rubanda. Ibitekerezo byo muri rubanda ntibitangizwa na kera habayeho ngo birangizwe na si nge wahera, kuko iyo bigenze gutyo kiba gihindutse umugani. Bishingira ku mazina y’abantu babayeho, cyangwa bagaragara nk’abayeho mu mateka kuko usanga ari abantu bagenda bavugwaho ku buryo butandukanye. Ibitekerezo byo muri rubanda bigaragaramo amakabyankuru n’ibitangaza kandi ntibitanga amacishirizo agaragara neza y’igihe ibintu byabereye.

Mu bitekerezo bya rubanda dusangamo kenshi ahantu hazwi ibivugwa byabereye, aho igihangange kivugwa cyari gituye, imisozi izwi iriho na n’ubu, ndetse n’ibintu bifatika bigaragara nk’ibimenyetso byasizwe n’igihangange kivugwa mu gitekerezo cya rubanda. Aha twatanga nk’ingero z’udusozi twitwa amabimba ya Ngunda, aho Cacana yarwaniye n’urupfu ku gasozi ka Zoko hari imbuga ishije neza,...

b) Itandukaniro hagati y’igitekerezo cya rubanda, insigamugani n’umugani muremure

Imbonerahamwe yerekana itandukaniro hagati y’umugani muremure, insigamugani n’igitekerezo cya rubanda.

Ingeri y’ubuvanganzo	Umugani muremure	Igiterekerezo cya rubanda	Insigamigani
Ingingo z’amateka yabayeho		✓	✓
Amakabyankuru n’ibintu bitabayeho	✓	✓	
Amakabyankuru agira umuntu usanzwe igihangange yaba yarabayeho cyangwa atarabayeho		✓	
Amakuru y’ibintu byabayeho cyangwa bitabayeho		✓	

Imigani y'imigenurano

Musesengure imvugo zikurikira mugaragaze imiterere yazo ku byerekeye interuro n'amagambo azigize ndetse no ku bisobanuro zifite:

- Irya mukuru urishima uribonye
- Irya mukuru riratinda ntirihera.
- Utazi ubwenge ashima ubwe.
- Utaganiriye na se ntamenya icyo sekuru yasize avuze.
- Ubuto bubeshya umuntu agaseka
- Amagambo atagira mukuru arumba ari indaro.

a) Inshoza y' imigani y'imigenurano

Imigani y'imigenurano bakunze kuyita imigani migufi bitewe n'uko igizwe n'amabango magufi ariko akubiyemo ingingo nyinshi. Akenshi iba igizwe n'interuro imwe irimo ibice bibiri kandi amagambo ayigize yumvikana ku buryo busanze.

Urugero: Utazi ubwenge/ashima ubwe. Imigani y'imigenurano yaciwe n'abakurambere, ariko ntidushobora kumenya izina ry'uwaciye umugani uyu n'uyu. Imigani y'imigenurano yatugezeho binyuze mu ruhererekane mvugo. Ni yo mpamvu iyo bajya guca umugani bagira bati: "Bakunda kuvuga ngo...", Burya koko babivuze ukuri ngo...."

b) Kuki iyo migani bayita imigenurano?

Kugenura ni ukuvuga ikintu ariko ushaka kuvuga ikindi, utabizi akibwira ko ari aho ugarukiye, naho ubizi agafindura icyo washakaga kuvuga mu buryo buteruye.

Kugenura ni nko guca amarenga. Hari abantu bafite amazina y'amagenurano. Ayo mazina aba afite icyo yerekeyeho. Ikerekana ko imigani igenura, nuko buri umugani wumvikana mu buryo bubiri. Uburyo bwa mbere ni ubwa kamere yawo mu mvugo iboneye, itagoronzoye; naho uburyo bwa kabiri n'ubwo mu mvugo y'amarenga ishushanya icyo bawuciriye. Mu buryo bwa mbere umugani wumvikanamo, ari bwo mvugo iboneye, kumva umugani ntibigoye. Dufashe nk'urugero, uvuze ngo "arimo gushigisha ntavura," birumvikana ko amata atavura ugenda uyakozamo umutozo uyavuruga buri kanya (gushigisha ni ugukaraga umwuko mu gikoma kiri ku ziko ngo ifu yivange n'amazi itaza gufata mu ndiba bigashirira), iryo ni ihame. Urumva koko ari byo, nta kindi gisobanuro ugomba kugira ngo wumve uwo mugani. Uburyo bwa kabiri ni uburyo bw'amarenga, uwumvise agomba gutekereza agashishoza kugira ngo amenye icyo uwo mugani bawugenuriraho, mbese ingingo ishushanya. Uyu mugani urerekana ingorane umuntu aterwa n'abamusesereza mu bikorwa bye bagira ngo berekane ko ibye bidashobora gutungana kandi bifite kidobya. Uko kumutobera urogoya imigambi ye, ni byo bagereranya no "gushigisha amata" kuko amata ubusanzwe aba ikivuguto ari uko wayateretse ukayarekera hamwe agatuza, akabona gufatana, ari byo bita. "kuvura". Imigani y'imigenurano ikubiyemo uturango twinshi tw'umuco wacu nk'uburezi n'uburere, imibanire, uko twumva isi n'ibiyiraho cyangwa ibitubaho n'ibindi.

Umwitoto

1.10. Sakwe Sakwe...! Soma!

Ica/findura ibisakuzo bikurikira:

- Mpiritse indobo ikwira ingo zose.
- Kinigiriye umugara kijya kubaza umugambi wo gutabara.
- Ngesa bumera.

- Sakuza n’uwo muri kumwe.
- Nyirabugenge n’ubugenge bwayo.
- Nkubise urushyi rurumira.
- Aho nagendaniye nawe wambwiye iki?
- Mpuye n’umuzimu atambana imbazo.
- Kakwica kakwigarika akambari ka Matene.
- Mama nararushye.
- Terera Rubona ubone ishyano.
- Ni ge muzindutsi wa cyane nasanze umuzimu yicanye ku kaguru.
- Nubatse urugo hejuru y’urupfu.
- Idagadure naraguharuriye.

1.11. Ibisakuzo

a) Inshoza y’ibisakuzo

Ibisakuzo ni umukino wo mu magambo, ugendanye n’ibibazo n’ibisubizo byabyo, bihimbaza abakuru n’abato, kandi birimo ubuhanga kuko byigisha gutekereza.

Ibisakuzo ni umukino nyurabwenge. Igisakuzo gisakuzwa mu magambo yacyo kikiwa mu magambo yacyo. Ibisakuzo byagiraga abahimbyi b’inzobere muri byo, bahoraga bacukumbura kugira ngo barusheho kunoza no gukungahaza uwo mukino. Umuntu asakuza n’uwo bangana cyangwa aruta. Mu muco nyarwanda kirazira gusakuza na Sobukwe cyangwa Nyokobukwe.

Usakuza abwira mugenzi we ati: “Sakwe sakwe”! Undi na

we akiriza ati: “Soma”. Akamubwira igisakuzo, akakica cyangwa kikamunanira.

Ugusakuza iyo abonye ko igisakuzo kikunaniye arakubwira ati: “Kimpe”. Nawe cyananiye uti: “Ngicyo”! Ubwo akakiyicira, ukaba uratsinzwe. Ibisakuzo bimwe na bimwe bigaragaza igihe byahimbiwe ndetse bikerekana amateka.

Ibyo bahimbye mu gihe imodoka, ifaranga, iradiyo, abazungu, byari bimaze kugera mu Rwanda.

b)

Ingero

Igisakuzo	Igisubizo
Nyamwitera agashyarara mu ishyamba.	Imodoka
Rambagira bugondo.	Imodoka mu muhanda.
Ihirike naraguharuriye.	Imodoka mu muhanda
Abazungu bazanye byinshi n’ibizatuzura.	Ifaranga
Nagutera icyatumye umugabo ataryama.	Ifaranga
Ni nde watanze umuzungu kwicara ku ifoteye.	Ivunja
Nkandagiye itafari rimena itegura risakaza inkuru i Burayi.	Iradiyo

Mu bisakuzo habonekamo ingingo z’umuco.

Ingero

Igisakuzo	Igisubizo
Mama arusha nyoko amabuno manini	Igisabo
Mama nshuti	Ikirago
Abana bange barara bahagaze bwacya bakaryama	Imyugariro

b) Akamaro k’ibisakuzo

Ibisakuzo bifasha abana ndetse n’abakuru gukora imyitozo mfuturamvugo igamije kubamenyereza gutekereza, kuvuga badategwa no kumenya gufindura imvugo zidanangiye kandi bikabatoza umuco ndetse bikanabamenyeshya amateka.

1.13. Ibisigingizo

a) Inshoza y'igisingizo

Izina igisingizo rikomoka ku nshinga “gusingiza” bisobanura kuvuga umuntu cyangwa ikintu ucyogezwa kubera ibyiza bye cyangwa byacyo. Igisingizo rero ni umwandiko wa gisizi; wanditswe ku buryo bw'imikarago, ukubiyemo amagambo yo kurata cyangwa yo kogeza umugiraneza. Ni na yo nkomoko y'imvugo zikurikira : “Kutavuga mu bisigingizo uwagukuye mu kaga ni uguhemuka.”, “Uko yahaye abantu benshi inka na bo ni ko bamuhunda ibisingizo”. Ibisigingizo rero si ingeri y'ubuvanganzo nyarwanda yihariye, ahubwo ingeri runaka y'ubuvanganzo ishobora kuba igisingizo bitewe n'uko insanganyamatsiko irimo yubakitse. Umuvugo, ikivugo cyangwa amayingabyivugo bishobora kuba ibisingizo igihe umuhanzi hari ikintu yasingizagamo.

b) Uturango tw'igisingizo

Uhangana igisingizo akoresha amagambo ataka cyangwa yogeza uwo cyangwa icyo asingiza, akagaragaza impamvu ituma amusingiza, akirinda kuvuga ibibi, akibanda ku byiza gusa.

Inshamake

Igisingizo ari umwandiko wa gisizi; wanditswe ku buryo bw'imikarago, ukubiyemo amagambo yo kurata cyangwa yo kogeza umugiraneza. Uhangana igisingizo akoresha amagambo ataka cyangwa yogeza uwo cyangwa icyo asingiza, akagaragaza impamvu ituma amusingiza, akirinda kuvuga ibibi, akibanda ku byiza gusa.

Ibyivugo by'amahomvu

a) Inshoza y'ibyvugo by'amahomvu Ni ibyvugo bigufi bisanzwe, abana bivuga.

b) Uturango tw'ibyvugo by'amahomvu

Akenshi haba harimo amagambo yo kwivuga birata ariko yo gusetsa no kwidagadura. Iyo rero bakitse imirimo baririmba akaririmbo ko guhamagarira buri wese kwivuga bagira bati: “ Uri inyundo, uri inyana ya Rukara rwa Ruyange, uri inyundo. Nawe Kanaka (bavuga izina ry'umuntu umwe mu bari aho) ngwino utubwire icyo wamariye abandi bahungu uri inyundo”. Uwivuga yigereranya n'ibintu, inyamaswa, akaba ari byo ashingiraho ubuhangange bwe. Aho kwirata ubutwari bwo ku rugamba uwivuga mu mahomvu yirata ubwiza, ubuhangange mu kurya, mu gukundwa n'abagore n'abakobwa, ...

Mu byivugo by'amahomvu habamo ibigereranyo bisekeje. Nta bikorwa byo ku rugamba bivugwamo ahubwo biba bigamije kwidagadura, kandi biba bisekeje.

- Ibikorwa birata si iby'ubutwari uwivuga yagiriye ku rugamba, ahubwo ni iby'ubuzima busanzwe. Uwivuga kandi ashiramo amakabyankuru.

IBINDI Ku buvanganzo bwo muri rubanda

Hagendewe ku ngingo zinyuranye mu byakusanyijwe bikuwe mu nyandiko zivuga iby'umuco nyarwanda, herekanwa ko ubuvanganzo bwagaragariraga mu buvanganzo nyemvugo bwo muri rubanda, ubu buvanganzo bwari mu ngeri nyinshi tugiye kubagezaho kandi bukagira n'umumaro mu ikoresha ryabwo.

1. Indirimbo n'ibihozo

Kuba tubona abantu baririmba; ibyo si ibya none byahozeho, haririmbwaga indirimbo z'urukundo, abantu bakavugwa ibigwi bagasingizwa mu ndirimbo, ababyeyi bakaririmbira abana ibihozo babaguyaguya, abageni ni uko bagaturwa ibihozo ndetse n'abandi bantu.

Urugero: Akira impumbya

Akira impumbya Muhoranampuhwe, Bihogo na we, yeee
Mutesi Mutoni dutunze se shenge mutako utanaze
Yeee, hahirwa koko uyu muruhuje
Reka uririmbwe Murerwa wa Runihura, ni wowe Gaju, yeee
Umucyo mu bakobwa, yeee
Mfura we ugira ubwiza uzira n'ubwanza Mukabaranga (Kanaka)
Yeee, utunyuze twase uko turi aha
Ubarusha uruhanga ruhanitse n'ihaniro, mu ruhimbi rw'amahoro, yeee
Yeee, mu rwari rw'abari, yeee
Ni koko uvuka heza no kuri beza, warezwe neza
Yeee, komeza uribore Muhorakeye.
Dore uwo turikana turikiriza muri uru rubyiruko se Kirez, yeee
Umutako mu bari, yeee
Barute mutatunaniza, uteye ubwuzu abawe
Yeee, gahorane ishya koko nyakubyara
Ubarusha umubyimba ukibwiruka,shenge, mbyeyi, yeee,
Mubwiruka utabyigana, yeee
Shenge we akira iraba ryo kugutaka Mukabaranga (kanaka)
Yeee, komeza utone ni koko uratoshye
Erega ngoro ngari yariboye ingondo inanurira ingeri
Usanze (ugende) amahoro, yeee,
Cyurirwa ingeyo nyamibwa, yeee
Shenge we si amatage tuzihoranira
Yeee, sugira usagambe no ku buvivi.

2. Imitoma

Imitoma yo yabaga igizwe n'amagambo meza ataka umuntu, kandi ikavugwa mu mvugo nziza iryoheye amatwi.

Imitoma yabaga yuje amagambo arimo inyurabwenge yuzuye urukundo, ibyo bigatuma uyumva wese atahwa n'umunezero, ikaba yarabaga igamije gushimangira umubano w'abakundana n'uw'abashakanye.

Ingero z'imitoma:

Mbe nagukunze rwinshi
Si urwejo n'ejobundi
Ni urwo wakuye iwanyu
Warusanze n'iwacu,

5. Kandi nagukoye nyinshi
Zimwe zitagira amayobera
Mvuga zikaryama neza
Kandi ga zikabyuka neza
Zigashoka ubutagisha

10. Zigahumuza ubudahwema.
Narakubonye nshira agahinda
Umutima utangira kuvumera
Kugukunda biwuvugisha
Nuko nigaba mu nganzo

Imitoma nayo, yashoboraga gucurangwa n'inanga ikarushaho kuryohera abayumva.

2. Ibihamagaro, amahamba n'amajuri

Ibihamagaro, amahamba n'amajuri, byabaga ari indirimbo baririmbira inka. Ibihamagaro bikoreshwa igihe zikamwa, amahamba bakayazirimbira bazicyuye naho amajuri ni ayo ku bibumbiro cyangwa ku mabuga badahira. Ibihamagaro, amahamba n'amajuri byaririmbwaga hose, bikaririmbirwa inka izo ari zo zose hadatoranijwe inyambo gusa. Aha bagenda basingiza inka iyi n'iyi, kuko ntibaba basingiza ubushyo nko mu mazina y'inika.

Ingero: Ibihamagaro by'inika:

Sembugo nayo ndayizi, ntiyibika yaroshye abanyaruyenzi, abenshi bahera mu nkuba inkomane zibarenganya, baganya batabaza umusare w'indongozi,

Bati "Warwambutsaga ari inyange noneho rwabaye inyanja n'ibisiga ntibicyiruca", inzovu isigaye ikandagira igatebera, bati "Nibayireke ni Ruguranura ku mpeshyi, bazayihe intumbi yihambire ni isanzwe ihotora induru iyo manzi ya Simugomwa."

Amahamba

Iya Kanuma (umushumba) umugungu atuma turimba abanyaburama, ndavuga inka mu kiririmbo cy'abashumba, itwaza yivuga asoma ubuki.

Umwihunge wa Ruhogo, bayibwiye ko Rwagitinywa yatashye i Mbuye, imbaraga iyirega mu muriri, inzira iyishakira aho idasanzwe.

Amajuri: Gitare cya Butera yateze itera hejuru, abakobwa b'i Nyanza bayambitse ingabo mu nda, Ndoha ay'ubusa yanze kurisha Gasese n'agasigati k'in yana, ngo icyo gihemu ntiyazagikira mu bantu.

3. Amahigi

Guhiga ni umurimo wari umenyereye kandi ukunzwe cyane mu Rwanda rwo ha mbere, bagahiga inyamaswa bagacyura umuhigo.

Guhiga byari n'umukino barushanyirizwagamo kuboneza no guhamya, naho abahigi bakabamo ingeri eshatu.

Hari ab'umuheto n'amacumu, bahigaga inyamaswa z'inkazi, hari n'abanyagishanga bahigaga ibihura, hakaba n'abongora bahigaga inkwavu ku misozi n'utundi dusimba tworoheje.

Abahigi mu ihimbarwa ryabo, niho bahimbye amahigi, akabamo indirimbo baririmbaga bacyuye umuhigo, akabamo amarekezi, ari byo bisingizo by'imbwa z'intozo, n'ibiyirahiro bimeze nk'ibiyivugo bisingiza umwambi n'umuheto.

Indirimbo: Ishyamba ni umubyeyi, abatarigenda bashya ibirenge, ndarara rikazimana, nasibira rigasibirira umuheto.

Amarekezi: Biringaragu rya Ngarambe ngabo ya rugango inganya urugwiro n’ingwe yabyaye. Umubore yayinonye mu bibungo bya mukingo ati “Ngaha nabona aho inka ihiga!” Abahigi bati “Ni igitare cya Rwego nyagushorerwa yanga kuganda; ni mpunga mu za Rutukurampunzi.”

Ibyirahiro: Nkwice Rugemandonyi induru ivugiye Rwamagaju, nyamurasa impara impagazi, impamarugamba twagiye Rwamagaju. Ilibagiza rya Kanyamulinja ryaribagizaga ingundu ingando y’ abahigi ikuzura inyama.

Abahigi bagiye bahimbira no ku nyamaswa bakundaga guhiga.

Ingwe: Ingwe ni, ni Intimbura - miganda ya rugongesha -misega, yikoreye imikaka mu ihurizo ry’igikari, basakiranye ikomeza ibyo kuba indoha bayita bitobo. Ifata umusega ikawusobeka impindu zombi, ntushobore guhumeka! Impaka zigashira mu bahigi, nicyo gituma batinya kwegera ubuvumo bwayo, kuko ihora ivuza insengo. Igira umujinya usetera mu matwi yitwa Rujwigira.

Igira ikijuju cyo mu gahanga, iyo isobanuye iridahemba iba yemeye kurwana na bene ruhebeba, iyo ishyikiranye na Ruhaya, ntikura ibirenge itayirengeje urugo!

4. Amagorane

Amagorane ni utugambo tw’invugo iryoheye amatwi abantu batondagura, ugasanga akenshi binanirana kuyavuga wuhuta, byatumaga umuntu yanavugiswe (akavuga ibintu uko bitari agira ngo arabyigana).

Kenshi usanga dusa nk’aho ntacyo tuvuze, uretse gusa ko dusetsa wagira ngo abahimbye amagorane ni abantu basaga n’abakina n’ururimi (mu mivugire) bakarushyiramo utunanirabaswa.

Mu magorane bakoresha isukiranya ry’insubirajwi. Mu gihe umuntu abivuga agira vuba agashobora kuba yateshaguzwa. Bitoza abana kwimenyereza kuvuga bagashobora kuvuga badategwa kandi bikababera nk’udukino.

Ingero:

- Ta izo njyo uze tujye kurya inzuzi kwa Rwahama.
- Nihinnye mu cyanzu n’igihu cyera cy’icyansi cy’uruhanga, njya gukamisha cyasha mu mpinga yo kwa Ntacyandasa.
- Umuja wacu Nyamukuru, nyamukondo, ntasya ifu ica isuka.
- Nshiye imbere y’ingoro mbona imbogo imbere y’ingoro.
- Yewe mwana umenye ikibindi, ta izo njyo za Nyiranjyurinjuri uze urye inzuzi ivure.

Umwandiko ntekerezo

Imbata y'umwandiko ntekerezo

Umwandiko ntekerezo utangirwa **n'umutwe**. Umutwe uba ugizwe n'interuro imwe ifitanye isano n'ibiri buvugwe mu kurambura ingingo, mbese ni inshamake y'umwandiko wose. Kugira ngo utandukane n'ibindi bice biwukurikiye, umutwe bawucaho umurongo cyangwa bagasiga umwanya mbere yo gutangira igice gikurikiyeho, cyangwa se ukaba wanditse mu buryo bwihariye (ugaragara cyane). Usibye uyu mutwe, umwandiko ntekerezo ugira ibice

by'ingenzi bitatu, ari byo intangiriro, igihimba n'umusozo.

Intangiriro n' umusozo biremwa n'igika kimwe kimwe mu gihe igihimba cyo kiremwa n'ibika byinshi.

Tumenye ko umwandiko wuzuye uba ufite nibura ibika bitatu. Iyo

bigiye muni, uwo mwandiko uba ubura igice kimwe cyangwa ibice bibiri mu bigize umwandiko.

Umwandiko “kwita izina” ugizwe n'ibice bine:

Umutwe	kwita izina
Intangiriro	igika cya mbere
Igihimba	kuva ku gika cya kabiri kugera ku gika cyamunani
Umusozo	igika cya nyuma.

Izina mbonera gakondo

a) Inshoza y'izina mbonera gakondo

Izina ni uburyo abantu bemeza kwita ibiriho, ibyo babona ibyo bumva, cyangwa ibyo batekereza. Dukurikije inkomoko y'amazina, amazina karemano mu rurimi rw'Ikinyarwanda, amazina y'umwimerere yitwa amazina gakondo (igiti, umugezi, umurima,...), mu gihe hari andi mazina y'amatirano nk'ishati, ikoti, ishuri n'ayandi. Dukurikije intego y'izina, amazina y'Ikinyarwanda afite uturemajambo tw'ibanze dutatu (indomo, indanganteko n'igicumbi), yitwa amazina nyakimwe cyangwa amazina mbonera.

b) Uturemajambo tw'izina mbonera gakondo

Kugira ngo umenye uturemajambo tw'izina, ubanza kurigoragoza (uritubya, uritubura cyangwa ukarishyira mu nteko zinyuranye). Igice kidahinduka ni cyo bita igicumbi (C) kibanzirizwa n'indanganteko (RT) na yo ibanzirizwa n'indomo(D).

Igicumbi: Ni akaremajambo k'izina kadahinduka iyo ugoragoje izina

Ingero

- Inka
- Agaka
- Uduka
- Ibika
- Igika...

Witegereje urasanga akaremajambo –ka kagaruka iteka iyo ugerageje gushyira ijambo inka mu nteko zinyuranye.

Indanganteko

Indanganteko: Ni akaremajambo kagaragaza inteko izina ririmo. Indanganteko z'amazina mu Kinyarwanda ni 16.

Ikitonderwa

Hari amazina atagaragaza indanganteko. Kugira ngo umenye inteko zayo uyashyira mu nteruro maze inteko z'amasano akaba ari zo zigaragaza inteko ayo mazina arimo. Bene ayo mazina akunda kuba mu nteko ya 5, 9 n'ya 10. Mu kugaragaza inteko z'ayo mazina hakoreshwa aka kamenyetso: φ

Ingero

Nt. ya 5	ibuye rinini riragaragara: i- φ -buye
Nt. ya 9	ihene nziza ni musheru: i- φ -hene
Nt. ya 10	ihene nziza ni iz'umusheru: i- φ -hene

Indomo

Indomo ni akaremajambo kagizwe n'inyajwi itangira izina. Mu Kinyarwanda inyajwi zishobora kuba indomo ni i, u, na a. Usibye igoragoza kugira ngo umenye indomo ushobora gukoresha impakanyu nta, indangahantu ku/mu, ijambo rihamagara “yewe”/”yemwe” imbere y'izina cyangwa se akajambo “ki” kabaza inyuma yaryo. Inyajwi itakara aba ari indomo.

Ingero

Nta mugabo mbona.	nta φ -mu-gabo
Yewe mugabo!	Yewe φ -mu-gabo.
Ese wagize ngo ni mugabo ki?	φ -mu-gabo ki?

c) Amategeko y'igenamajwi akoreshwa mu izina mbonera gakondo

Amazina mbonera gakondo yuzuye. Ni ukuvuga afite uturemajambo twose uko ari dutatu.

Ingero

Umuntu	u-mu-ntu
Umugabo	u-mu-gabo
Umusore	u-mu-sore
Umwana	u-mu-ana(u→w/-J) Bivuga ngo u ihinduka w iyo iri imbere y'inyajwi.
Inzoga	i-n-yoga (y→z/n-)
Induru	i-n-ruru (r→d/n-)
Imbeba	i-n-beba (n→m/-b)
Imfura	i-n-pfura (p→ ø /n-f) n→ m/-f
Imyeyo	i-mi-eyo (i→y/-J)
Amenyo	a-ma-inyo (a+i→e)
Abana	a-ba-ana (a→ ø /-J)
Inyoni	i-n-nyoni (n→ ø /-ny)
Imana	i-n-mana (n→ ø/-m) / i - - mana
Inuma	i-n-numa (n→ ø /-n)
Igicuma	i-ki-cuma (k →g/-GR)
Uduca	u-tu-ca (t→d/-GR)

Ikitonderwa

Hari ibicumbi bifata ingombajwi “z” mu nteko ya 10 bitari biyisanganywe.

Ingero

Urugi => inzugi	i-n-zugi
Uruzi =>inzuzi	i-n-zuzi
Urwabya =>inzabya	i-n-zabya

Izindi Ingero

Izina	Uturemajambo	Itegeko	
1	Umwiko	u - mu - iko	u → w /-J
2	Abana	a - ba - na	a → ø /-J
3	Akebo	a - ka - ibo	a + i → e
4	Imyuko	i - mi - uko	n → y /-J
5	Imbaga	i - n - baga	n → m /-b
6	Imfwati	i - n - fwati	n → m /-f
7	Impinja	i - n - hinja	n → m /-h; mh → mp mu myandikire yemewe y'Ikinyarwanda
8	Icyuma	i - ki - uma	i → y /-J; ky → cy mu myandikire yemewe y'Ikinyarwanda
9	Impapuro	i - n - papuro	n → m /-p
10	Imvura	i - n - vura	n → m /-v
11	Induru	i - n - ruru	r → d /n-
12	Igihaza	i - ki - haza	k → g /-GR
13	Udushaza	u - tu - shaza	t → d /-GR
14	Inzoga	i - n - yoga	y → z /n-
15	Insibo	i - n - tsibo	t → ø /n-s
16	Inshuro	i - n - curo	c → sh /n-
17	Imfizi	i - n - pfizi	m → m/-p; p → ø/m-f
18	Inzuzi	i - n - uzi	Igicumbi gifata z mu nt 10.

Amazina mbonera gakondo atuzuye.

Ni ukuvuga atagaragaza kamwe mu turemajambo.

Amazina mbonera gakondo atagaragaza kamwe cyangwa tubiri mu turemajambo tw'amazina mbonera, akaremajambo katagaragara gahagararirwa n'iki kimenyetso "ø"

Ingero

Umushiki	ø - mu - shiki
Ishyamba	i- ø-shyamba
Izuru	i- ø-zuru
Data	ø -ø-data
Se	ø -ø-se
Mama	ø -ø-mama
Nyina	ø -ø-nyina

Umutwe wa kabiri

Umutwe 2: Umuco w'amahoro

Ntera

a) Inshoza ya ntera

Ntera ni ijamba rigaragira izina rikisanisha na ryo, rigafata indanganteko yaryo ho indangasano.

Ingero

- Imihini **mishya** itera amabavu.
- Intege **nke** zitera imico myiza.

b) Uturango twa ntera

Ntera isobanura izina ivuga imimerere cyangwa imiterere yaryo. Ntera kandi ishobora kwinjira mu nteko zose uko ari 16.

Mu nteruro, ntera igaragira izina ikisanisha na ryo, igafata indanganteko yaryo ho indangasano.

c) Intego ya ntera

Mu rwego rw'iyigantego, ntera ni ijamba rirangwa n'indangasano n'igicumbi: RS+C

Indangasano za ntera

Inteko	Indangasano	Isanisha	Uturemajambo twa ntera
1	mu-	Umuntu mubi	mu-bi
2	ba-	Abantu babi	ba-bi
3	mu-	Umusozi mubi	mu-bi
4	mi-	Imisozi mibi	mi-bi
5	ri-	Iriba ribi	ri-bi
6	ma-	Amariba mabi	ma-bi
7	ki-	Ikibaho kibi	ki-bi
8	bi-	Ibibaho bibi	bi-bi
9	n-	Inkono mbi	n-bi
10	n-	Inkono mbi	n-bi
11	ru-	Urugo rubi	bu-bi
12	ka-	Akabindi kabi	ka-bi
13	tu-	Utubindi tubi	tu-bi
14	bu-	Ubwoba bubi	bu-bi
15	ku-	Ukuboko kubi	ku-bi
16	ha-	Ahantu habi	ha-bi

Ibicumbi bya ntera

Ibicumbi bya ntera bifatana n'indanganteko zose uko ari 16. Si byinshi, ni ibi bikurikira:

Igicumbi	Urugero	Igicumbi	Urugero
-bi	Umuntu mubi	-nini	Umurima munini
-bisi	Igiti kibisi	-niya	Akazu kaniya
-gari	Inzu ngari	-nuya	Akazu kanuya
-gufi	Umugore mugufi	-re	Ahantu kure
-hire	Urugendo ruhire	-sa	Umwana musa
-inshi	Inka nyinshi	-shya	Umwenda mushya
-iiza	Inzu nziza	-tagatifu	Umuntu mutagatifu
-ke	Abantu bake	-tindi	Umutego mutindi
-kuru	Umwana mukuru	-to	Umuntu muto
-zima	Umugabo muzima		

Ikitonderwa

- Igicumbi -re-re ni -re kisubiramo
- Igicumbi-to kigira impuzantego zisubiramo ebyiri:
- toto: gitoto na -to- -to-to: gitogito.
- Ibicumbi-gufi, -to, na -ke bishobora gukorana n'umusozo -ya: mugufiya, bikeya.
- Igicumbi-niya kigira impindurantego nyinshi:-nuya, -nzinya, -nzunya, -nzuguronyu.
- Igicumbi shya kigira impindurantego yisubiramo: -shyashya.

d) Amategeko y'igenamajwi akoreshwa muri ntera

Urugero	Uturemajambo	Itegeko
Amazi meza	ma-iza	a+i→e
Utwana dutoduto	tu-to-tu-to	t→d/-GR
Ikijumba gitogito	ki-to-ki-to	k →g/-GR
Ihene mbi	n-bi	n→m/-b
Ibishyimbo byiza	bi-iza	i→y/-J
Ingoma mpire	n-hire	n→m/-h mh→mp mu myandikwa
Inkoni ndende	n-re-n-re	r→d/n
Umwana mwiza	mu-iza	u→w/-J

Izina ntera

a) Inshoza y'izina ntera

Izina ntera ni ijamba rifite intego nk'iy'izina nyakimwe cyangwa ry'urusobe, bigatandukanywa n'uko rishobora gukoreshwa mu nteko zose kimwe na ntera.

b) Uturango tw'izina ntera

Izina ntera rigira intego nk'iy'andi mazina yaba asanzwe cyangwa ari ay'urusobe. Izina ntera akenshi rirangwa no kuba ari ntera iba yafashe indomo.

Urugero:

Umwiza (u-mu-iza) arahenda
Amazina ntera afite imiterere y'izina ariko akagira
umumaro nk'uw'izina ntera mu nteruro.

Urugero:

Imodoka y'imvaburayi. i - n - vu - a - burayi (kuva+iburayi)

c) Amoko y'izina ntera

Izina ntera rikomoka kuri ntera

Izina ntera rikomoka kuri ntera riba ari ntera yafashe indomo.

Ingero

Umwana mubi (umubi)
Umwana munini (umunini)

Izina ntera riteye nk'izina

Izina ntera riteye nk'izina riba ari izina risobanura imiterere y'irindi zina rirugaragiye bigahuzwa n'ikinyazina ngenera, inshinga **ni** cyangwa **si**.

Urugero

- Umusore w'umurundi.
- Inka y'ikibamba.
- Umujinya w'umuranduranzuzi.
- Amazi y'amasabano.
- Uyu mwenda ni umutuku.

Ikitonderwa

Izina ntera ryisanisha n'izina rifutura keretse iyo rivuga ibara.

Urugero

- Inkweto z'icyatsi.
- Ikibaho cy'umukara.

d) Uturemajambo n'amategeko y'igenamajwi akoreshwa mu izina ntera

Izina ntera rigira uturemajambo nk'utw'izina risanzwe ni na yo mvano yo kwitwa izina ntera. Ni ukuvuga D-RT-C (indomo, indanganteko n'igicumbi). Cyakora hari amazina ntera akomoka ku mazina y'urusobe bityo akagira intego nk'iy'izina ry'urusobe.

Ingero

Ijambo	Uturemajambo	Amategeko y'igenamajwi
Umwiza yaje	u-mu-iza	u→w/- J
Amenshi twayaniste	a-ma-inshi	a+i → e
Imyinshi yakozwe	i-mi-inshi	i→y/- J
ikiza bakivuze	i-ki-iza	i→∅ /- J
indede bayitemye	i-n-re-n-re	r→d/ n-
Ugutagatifu ni ukwezi kwa cumi	u- ku-tagatifu	k→g/-GR
Udutoto ni utwo	u-tu-toto.	t→d/-GR
Impire ni izo mpinja	i-n-hire	n→m/ -h, mh→mp mu nyandiko
Inini yaguzwe	i-n-nini	n→∅/- n
Inziza ni iyo ndobo	i-n-iza	Ibicumbi bifata “z” mu nteko ya 9 n' iya 10
Inyinshi zahutse	i-n-inshi	n→ny/-J

Igisanterera

a) Inshoza y'igisanterera

Igisanterera ni ijamba rijya kwitwara nka ntera bigatandukanywa n'uko igisanterera idakoreshwa mu nteko zose nka ntera.

b) Uturango tw'igisanterera

Igisanterera kirangwa no kugira umwanya n'umumaro nk'uwa ntera mu nteruro. Bimwe mu bisanterera bifata indangasano isa n'iy'izina bigaragiye, ibindi ntibiyifata, ahubwo usanga bidahinduka.

c) Intego y'ibisanterera

Intego y'igisanterera igaragaza indangasano isa n'iy'izina kigaragiye utundi turemajambo tugasa n'utw'inshinga cyangwa izina ry'urusobe.

Ibisanterera bifata indangasano

Ingero

- Umwana murizi ntakurwa urutozi.
- Umutima muhanano ntiwuzura igituza.
- Inkuru mbarirano iratuba

Igisanterera kidafata indangasano y'izina kigaragiye

Usanga buri gihe gifite indangasano isa n'iy'yo mu nteko ya kabiri cyangwa iya cumi. Ntigifata na rimwe indangasano isa n'indanganteko y'izina kigaragiye.

Igisanterera gikomoka ku mazina rusange cyangwa ntera.

Urugero

- Amazi buzi.
- Umukungu jumba.
- Umugore gito.

Ingero

Ibihingwa ngengabukungu
Ibiro mpuzamahanga
Ikigo ndangamuco
Inzira nyabagendwa
Umuco nyarwanda

d) Amategeko y'igenamajwi akoreshwa mu gisanterera

Amategeko y'igenamajwi akoreshwa mu gisanterera ni kimwe n'akoreshwa mu mazina y'urusobe.

Itegeko	Urugero
Umuco nyarwanda = nya-ruanda	
r→d/ n-	Inzu ndangamuco = n-rang-a- Ø-mu-co
n→m/ -h	Umuco mpuzamahanga = n-hur-y-a-Ø-ma-hanga
n→m/-b	Inkuru mbarirano = n-bar-ir-an-o
r+y →z	Umwana murizi = mu - rir - yi
n→m/-v	Ingeso mvukanwa= n-vuk-an-w-a
d+y-z	Umumarayika murinzi=mu-rind-yi

e) Kugereranya ntera, izina ntera n'igisanterera

Ntera	Izina ntera	Igisantero
<p>Ntera yisanisha n'izina igaragiye ikagaragazanimico cyangwa imimerere yaryo</p>	<p>Izina rigira intego nk'iy'izina nyakimwe cyangwa ry'urusobe, bigatandukanywa n'uko rishobora gukoreshwa mu nteko zose kimwe na ntera. Izisantera akenshi ni ntera iba yafashe indomo igasimbura izina yagombaga kugaragira</p>	<p>Igisantero, mu nteruro, kigira umwanya n'umumaro nk'ibya ntera bigatandukanywa n'uko kitagira intego nk'iya ntera kandi ntigishobore kwisanisa, buri gihe, n'izina kigaragiye mu nteko zose.</p>

Umutwe wa gatatu

Umutwe wa 3: Uburinganire n'ubwuzuzanye

3.2. Ibiganiro mpaka

Inshoza y'ibiganiro mpaka

Iyo umuntu agiye gutanga ibitekerezo ku nsanganyamatsiko runaka, hari uburyo butandukanye aba ashobora gucishamo ibitekerezo bye. Impaka ni bumwe mu buryo bushobora gukoreshwa mu itangwa ry'ibitekerezo. Ubu buryo ni ibiganiro bikorwa hagati y'abantu batandukanye ku nsanganyamatsiko ihari. Mu by'ukuri ibiganiro mpaka bikorwa iyo hari ikibazo gikeneye umuti buri wese agatanga uwe uko abyumva ku buryo bya bitekerezo bikusanywa bikaba ingirakamaro mu gukemura ikibazo runaka. Muri ibi biganiro abantu baganira bari mu matsinda atandukanye hagamijwe kungurana ibitekerezo. Ni ukuvuga ko Atari impaka za ngo turwane. Muri ibyo biganiro, haba hari itsinda ry'abashyigikiye insanganyamatsiko yatanzwe, hakaba n'abatayishyigikiye.

Abashyigikiye insanganyamatsiko

Aba batanga ibitekerezo byabo bashyigikira insanganyamatsiko yatanzwe bagamije kugaragaza ko ibivugwa mu nsanganyamatsiko ari ukuri cyangwa se ihame. Berekana ko uko insanganyamatsiko yatanzwe ari byo byakemura ikibazo gihari.

Abadashyigikiye insanganyamatsiko

Aba batanga ibitekerezo byabo basenya insanganyamatsiko yatanzwe bagamije kugaragaza ko ibivugwa mu nsanganyamatsiko atari ukuri cyangwa se atari ihame. Baba bagamije kumvikanisha ko uko insanganyamatsiko imeze atari byo byakemura ikibazo ahubwo ko hari ukundi cyakemuka, bakagaragaza uko kundi cyakemuka. Kugira ngo ikiganiro mpaka kigende neza, haba hari n'umuyobozi w'ikiganiro ushobora kuba ari umwe cyangwa se afite n'undi umwunganira.

Umuyobozi w'ikiganiro

Uyu ni we uyobora ikiganiro mpaka, akagenda ahaumwanya abajya impaka ndetse akanabagera igihe bakoresha. Iyo umwe mu bajya impaka arangije gutanga ibitekerezo bye, umuyobozi w'ikiganiro aha mugenzi we badahuje ibitekerezo ijambo, kugira ngo agire ibyo avuga ku byo mugenzi we yavuze. Uyu kandi ni na we usubiza mu murongo abajya impaka iyo basa n'abagiye gutandukira insanganyamatsiko yabo.

Indorezezi

Aba ni abantu baza kwitabira ikiganiro mpaka bagamije kumva ibitekerezo bitandukanye by'abajya impaka. Iyo abajya impaka barangije gutanga ibitekerezo byabo, abaje kwitabira ikiganiro baba na bo bashobora kwaka ijambo bagatanga ibitekerezo byabo bishyigikira cyangwa bidashyigikira rimwe mu itsinda ry'abajyaga impaka. Aha ni na ho uyobora ikiganiro ashobora guhera agaragaza ko uruhande uru n'uru ari rwo rwatanze bitekerezobifatika bitewe n'umubare w'indorezezi washyigikiye ibyo bitekerezo.

Amabwiriza agenga ibiganiro mpaka

- Mu kungurana ibitekerezo, umwe mu bajya impaka, iyo agiye gutanga igitekerezo ke, abanza kugaragaza ko ibyo mugenzi we wamubanjirije batari mu itsinda rimwe atari byo, akabisenyesha ingingo zifatika maze akabona gutanga igitekerezo ke bitewe n'uruhande abogamiyemo.

- Mu kiganiro mpaka uvuga agomba kumenya ko arebwa cyangwa ajorwa n'ababwirwa, ni na yo mpamvu agomba kwita ku mivugire n'imiterere y'ijwi rye, ku guhinduranya amajwi, ku gusubizanya ukuri no gusubiza akoresheje ingingo zuzuye.

- Uri mu kiganiro mpaka agomba kudatinya no kuterekana ko ikibazo abajijwe kimutunguye, akamenya kwihanganira ibitekerezo by'abandi, ntahubuke cyangwa ngo atongane.

- Mu gihe k'ikiganiro, abatwimirwa bamaze kwicara, uyobora ikiganiro amaze kubavuga mu buryo bubangutse, agomba kwirinda kugira ibisubizo we atanga cyangwa abahatira ahubwo akibanda ku kubereka umurongo w'ikiganiro.

- Iyo umwe mu bajya impaka atanze igitekerezo ke, biba byiza ko uyoboye ikiganiro agisubiramo muri make kugira ngo undi agihereho atanga ike. Iyo impaka zikomeye, umuyobozi w'ikiganiro ahwitura abihaye ijambo.

- Mu kiganiro mpaka, buri wese agomba guhabwa ijambo ariko ntaryiharire, ushatse kuryiharira, uyoboye ikiganiro arimwaka mu kinyabupfura cyane nk'iyi abona ibitekerezo byari bimutegerejweho yabitanze.

- Umuyobozi w'ikiganiro mpaka agomba guhoza ku mutima uburyo n'itegeho y'icyo kiganiro mpaka.

Uko bicara mu biganiro mpaka

Abari mu kiganiro mpaka bicara ahantu habonyeye kandi habona. Hagomba kuba hafasha mu buryo bwo kwicara kugira ngo ikiganiro kibonere. Mu kiganiro mpaka, hari uburyo butandukanye bicaramo kugira ngo ikiganiro kigende neza. Iki gishushanyo gikurikira kirerekana uko abakora ikiganiro mpaka bicara:



Ubu buryo bwo kwicara ni bumwe mu buryo bwiza bukoreshwa mu kiganiro mpaka, kubera ko umuyobozi w'ikiganiro aba ashobora kugenzura neza abajya impaka ndetse n'indorerezi zitabiriye ikiganiro. Ubu si bwo buryo bwiza bwonyine, icya ngombwa ni uko umuyobozi aba ashobora kugenzura abajya impaka, kandi mu bajya impaka ntawuteye undi umugongo.

3.3. Imyandikire yemewe y’Ikinyarwanda

Itegereze aka gace k’inkuru yo mu kinyamakuru maze usubize ikibazo kiri hasi.

Gakenke: Ihame ry’uburinganire n’ubwuzuzanye rirubahirizwa ariko ntirishirwa mubikorwa

Nubwo ihamwe ry’uburinganire n’ubwuzuzanye ryubahirizwa n’abatuye mu karere ka Gakenke ariko ngo ntirishirwa mubikorwa kuko abashakanye batashobora kubyumva kimwe, ku buryo hariho hariho abuma ko hari byo batagomba gukora murugo bakabiharira bagenzi babo. kudashirwa mubikorwa ry’uburinganire n’ubwuzuzanye nibyo usanga keshi bituwa imiryango idatera imbere, kuko habaho gusigana kubashakanye, aho umwe aharira mugenzi we imirimo runaka kandi nyamara kugira ngo iterambere ry’umuryango rigerweho bisaba ubufatanye hagati y’abashakanye.

Kurundi ruhande hari naho usanaga abagore nabo barabyumvishe nabi kuburyo nabo basiganya abagabo babo kandi bose bagakwiye kuzuzanya. Kuko kwigisha ar’uguhozaho inzego z’ubuyobozi zikaba zasabwe kugumya kujya barushaho gusobanura ihame ry’uburinganire n’ubwuzuzanye kugirango ritaba intandaro y’ubutane hGti y’abashakanye.

Gira icyo uvuga ku myandikire y’amagambo cyangwa imigemo yashyizwemo biciyeho akarongo. Ku bwawe ni ko wabyandika? Kubera iki?

Inshoza y’imyandikire y’ururimi

Imyandikire inoze y’ururimi ni urusobe rw’amategeko ashyirwaho mu rwego rwo kugena ibimenyetso bishushanya amajwi y’ururimi runaka. Mu rwego rwo kunoza imyandikire hakaba hifashishwa amahame y’iyigandimi nk’ubumenyi bugamije kwiga indimi zivugwa akaba ari na yo mpamvu imishinga yose igena imyandikire inoze y’ururimi ikorwa hitabajwe impuguke muri ubwo bumenyi bw’iyigandimi. Aya akurikira ni amategeko agenga imyandikire y’Ikinyarwanda:

1. Imyandikire y’inyajwi

Inyajwi z’Ikinyarwanda zandikishwa inyuguti zikurikira: a, e, i, o, u.

Uretse mu nyandiko ya gihanga ikorehwa mu mashuri no mu bushakashatsi gukurikiranya inyajwi birabujijwe mu myandikire isanzwe y’Ikinyarwanda keretse inyajwi ebyiri mu myandikire y’ijambo ry’iritirano “(i)saa” rivuga igihe. Mu magambo y’amarangamutima, imigereka n’inyigana birimo isesekaza, hakorehwa inyajwi zitarenga eshatu zikurikirana.

Ingero

- Irangamutima: “yooo”!
- Umugereka: Ndagukunda “cyaneee”!
- Inyigana: “pooo”; “mbuuu”!

2. Imyandikire y' ingombajwi shingiro

Ingombajwi shingiro z'Ikinyarwanda zirimo amoko akurikira:

- Ingombajwi shingiro zandikishwa inyuguti imwe:

b, c, d, f, g, h, j, k, m, n, p, r (l), s, t, v na z.

Mu Kinyarwanda inyuguti ya r ntabwo itandukanye na lmu rwego rw'imivugirwe ndetse no mu rwego rwo kurema amagambo. Umuntu yavuga ko atari amajwi shingiro abiri atandukanye ko ahubwo, kuba zigaragara uko ari ebyiri byaratewe n'uko Abazungu bagennye imyandikire y'Ikinyarwanda bahereye ku ndimi zabo. Inyuguti "l" ikoresha gusa mu izina bwite "Kigali", umurwa mukuru wa Repubulika y'u Rwanda, mu ijambo "Repubulika", mu ijambo "Leta" no mu mazina bwite y'amanyamahanga y'abantu n'ay'ahantu.

Ingero

- Ntuye i Kigali.

- Repubulika y'u Rwanda

- Angola, Londoni, Lome, Lusaka, Buruseli, Aluberi.

Icyakora, inyuguti "l" iguma gukoresha mu mazina bwite y'amanyarwanda y'abantu yari isanzwe ikoreshwamo kandi bayiswe mbere y'amabwiriza mashya.

- **Ingombajwi shingiro zandikishwa inyuguti ebyiri:** ny, sh, pf, ts.

- **Ingombajwi shingiro yandikwa n'inyuguti eshatu:** shy

- **Inyerera:** w na y

- **Ingombajwi z'ibihokane:**

3. Inyuguti zandika ingombajwi z'ibihokane:

Inyuguti zandika ingombajwi z'ibihokane mu Kinyarwanda, ni ukuvuga ingombajwi shingiro ibanjirijwe n'inyamazuru, ingombajwi shingiro ikurikiwe n'inyerera imwe cyangwa ebyiri, ingombajwi shingiro ibanjirijwe n'inyamazuru igakurikirwa n'inyerera imwe cyangwa ebyiri, zikubiye mu rutonde rukurikira:

mb, mf, mp, mv, nd, ng, nj, nk, ns, (nts), nsh, nshy, nt, nz; bw (bg), cw, dw, (fw), gw, hw, jw, kw, mw, nw, nyw, (pfw), (pw), rw, shw, shyw, sw, tsw, tw, (vw), zw; by, cy, jy, my, nny, pfy, py, ry, sy, ty, (vy); byw, myw, pfyw, (ryw), (vyw); mbw, (mfw), mpw, (mvw), ndw, ngw, njw, nk, (nshw), (nshyw), (nsw), ntw, nzw; mby, mpy, (mvy), nshy, ndy, njy, nsy, nty; (mbyw), (mvyw), njyw.

Usibye "bg" mu ijambo "Kabgayi" ingombajwi z'ibihokane zitari muri uru rutonde zirabujijwe.

Ikitonderwa

Hari ibihokane bigira imyandikire yihariye bitewe n'inyajwi bikurikiye.

Ingero:

Imyandikire y'ibihokane "(n)kw", "(n)gw", "hw", bikurikiwe n'inyajwi "o" cyangwa "u"

Ibihokane "(n)kw", "(n)gw", "hw", bikurikiwe n'inyajwi "o" cyangwa "u" ntibyandikwa; mu mwanya wabyo handikwa "(n)ko", "(n)ku", "(n)go", "(n)gu", "ho", "hu".

Ingero:

- Kwanga koga ni bibi.

- Kubaka ni ukugereka ibuye ku rindi.

- Pariki ya Nyungwe ibamo inguge nyinshi.

- Ngwije na Ngoboka bava inda imwe.
- Korora inkwavu n'inkoko bifite akamaro.
- Iyo ngiye kwinjira mu nzu nkuramo inkweto.
- Mariya ahwituye Hoho kugira ngo yihute.
- Mahwane aragesa amahundo.

Imyandikire y'ibihokane “(n)jy” na “(n)cy”, bikurikiwe n'inyajwi “i” cyangwa “e”

Ibihokane “(n)jy” na “(n)cy” byandikwa gusa imbere y'inyajwi “a”, “o” na “u”. Imbere y'inyajwi “i” cyangwa “e” handikwa “(n)gi”, “(n)ge”, “(n)ki”, “(n)ke”.

Ingero

- Umugi ntuyemo ufite isuku.
- Gewe / ngewe ntuye mu magepfo y'u Rwanda.
- Njyanira ibitabo mu ishuri gewe ngiye gukina.
- Njyana kwa masenge.
- Iki ni ikibabi k'igiti.
- Ikibo cyuzuye ibishyimbo.

Ibihokane bigizwe n'ingombajwi “ts”, “pf” na “c”

Ibihokane bigizwe n'ingombajwi “ts”, “pf” na “c” zibanjirijwe n'inyamazuru byandikwa mu buryo bukurikira:

“ns”, “mf”, “nsh”.

Ingero

- Insina za kijyambere zitanga umusaruro utubutse.
- Imfizi y'inshuti yange.

Gukata

Mu myandikire y'Ikinyarwanda hari inyajwi ziba zigomba gukatwa ariko hari n'izidakatwa.

Ikata ry'inyajwi zisoza ibinyazina ngenera n'ibyungo “na” na “nka”

Inyajwi zisoza ikinyazina ngenera n'ibyungo “na” na “nka” zirakatwa iyo zikurikiwe n'ijambo ritangiwe n'inyajwi ariko inyajwi isoza ikinyazina ngenera gikurikiwe n'umubare wanditse mu mibarwa ntikatwa.

Ingero

- Wakomerekejwe n'iki?
- Ntakibyara nk'intare n'ingwe.
- Umubare w'amashuri y'imyuga uriyongera.
- Nyereka uko batsa tereviziyo n'uko bayizimya.
- Umwaka w'ibihumbi bibiri na cumi n'ibiri
- Umwaka wa 2012.

4. Inyajwi zisoza zidakatwa

Usibye inyajwi zavuzwe haruguru, inyajwi zisoza andi moko y'amagambo ntizikatwa.

Urugero

Kabya inzozu.

Inyajwi “i” isoza akabimbura “nyiri”, n'inshinga mburabuzi “ni” na “si” ntizikatwa.

Ingero

- Nyiri ubwenge aruta nyiri uburyo
- Amasunzu si amasaka

- icyatumye ejo ntaza iwawe ni uko natashye ndwaye.

Icyakora ijambo “nyiri” iyo riri mu mazina amwe n’amwe y’icyubahiro rifatana n’ijambo ririkurikiye.

Urugero

Nyiricyubahiro Musenyeri.

Naho “nyira” ivuga “nyina wa” ikoreshwa mu mazina, ifatana n’ijambo ibanjirije.

Nyirabukwe aramukunda.

Ikitonderwa

Inyajwi zitangira amazina akurikira indangahantu “mu” na “ku”.

Inyajwi itangira amazina bwite n’amazina rusange akurikiye indangahantu “mu” na “ku” iratakara, keretse mu ijambo ritangirwa n’inyajwi “i” ikora nk’indanganteko.

Ingero

- Mu Mutara higanje imisozi migufi.

- Mu Kagera habamo ingona.

- Amatungo yanyuze mu murima.

- Kwita ku nka bigira akamaro.

- Abana bavuye ku iriba bajya mu ishuri.

- Banyuze mu ishyamba.

Inyajwi zisoza indangahantu “ku” na “mu” ntizikatwa kandi zandikwa iteka zitandukanye n’izina rikurikira.

Ingero

- Amatungo yanyuze mu murima.

- Kwita ku nka bigira akamaro.

5. Amagambo afatana n’adafatana

a) Amagambo y’inyunge

Amazina y’inyunge harimo n’amazina bwite y’inyunge yandikwa afatanye.

Ingero

- Umwihanduzacumu

- Rugwizangoga

- Umukangurambaga

- Umuhuzabikorwa

- Amayirabiri

Icyakora mu bisingizo, mu byivugo no mu migani, amazina nteruro agizwe n’amagambo arenze ane (4) yandikwa atandukanyijwe kandi agashyirwa mu twuguruzo n’utwugarizo.

Urugero

Ubwo “Inshyikanya ku mubiri ya Rugema ahica” aba arashinze.

b) Amagambo afutura

Amagambo mfutuzi yandikwa atandukanyijwe n’amagambo afuturwa.

Ingero

- Inama Njyanama

- Umuco nyarwanda
- Umutima nama
- Umutima muhanano
- Inyandiko mvugo.

c) Ibyungo “na” na “nka”

Ibyungo “na” na “nka” bikurikiwe n’ibinyazina ngenga bivuga nyakuvuga na nyakubwirwa (ngenga ya 1 n’iya 2) byandikwa mu ijambo rimwe ariko bikandikwa bitandukanye n’ibinyazina ngenga muri ngenga ya 3.

Ingero

- Ndumva nawe umeze nkange.
- Ndabona natwe tumeze nkamwe.
- Ndumva na we ameze nka bo.
- Ndabona na ko kameze nka bwo.

d) Ikinyazina ngenera n’ikinyazina ngenga

Iyo ikinyazina ngenera gikurikiwe n’ikinyazina ngenga byandikwa mu ijambo rimwe.

Ingero

- Umwana wange
- Umurima wacu
- Ishati yawe
- Amafaranga yabo

e) Impakanyi “nta”

Impakanyi “nta” yandikwa ifatanye n’inshinga itondaguye iyikurikiye ariko iyo ikurikiwe n’ubundi bwoko bw’ijambo biratandukana.

Ingero

- Iwacu ntawurwaye
- Muri iri shuri ntabatsinzwe
- Ya nka ntayagarutse
- Nta we mbona
- Nta cyo ndwaye

f) Ibinyazina ngenga ndangahantu

Ibinyazina ngenga byo mu nteko ndangahantu “ho”, “yo”, “mo (mwo)” n’akajambo “ko” bifatana n’inshinga bikurikiye, keretse iyo iyo nshinga ari “ni” cyangwa “si”.

Ingero

- Wa mugabo nimusangayo turagenderako ntitugaruka.
- Ya nama yayivuyemo.
- Kuki yamwihomyeho?
- Ni ho mvuye.
- Si ho ngiye.

g) Akajambo “ko”

Akajambo “ko” kunga inyangingo ebyiri kandikwa gatandukanye n’amagambo agakikije.

Ingero

- Mwarimu avuze ko dukora imyitozo.
- Ndatekereza ko baduhembye.

h) Urujyano rurimo ijambo “ngo” kimwe n’ibinyazina “wa wundi”, “bya bindi”, “aho ngaho”, “uwo nguwo”.

Urujyano rurimo ijambo “ngo” kimwe n’ibinyazina: “wa wundi”, “bya bindi”, “aho ngaho”, “uwo nguwo”, n’ibindi biremetse nka byo byandikwa mu magambo abiri.

Ingero

- Kugira ngo wa wundi adasanga wagiye, ukwiye kuba ugumye aho ngaho.
- Bwira uwo nguwo yinjire.
- Fata aka ngaka, ibyo ngibyho bireke.

i) Ijambo “ni” rikurikiwe n’inshinga irimo inshoza yo “gutegeka” no “guteganya”

Ijambo “ni” rikurikiwe n’inshinga ifite inshoza yo “gutegeka” cyangwa iyo “guteganya” ryandikwa rifatanye na yo.

Ingero

- Nimugende mudasanga imodoka yabasize.
- Nimugerayo muzamundamukirize.

j) Amagambo yerekana ibihe n’ahantu

Amagambo yerekana ibihe yandikwa mu ijambo rimwe: “nimunsi”, “nijoro (ninjoro)”, “nimugoroba”, “ejobundi”.

Ingero

- Aragera ino nijoro.
- Araza nimugoroba.
- Yatashye ejobundi.

Ijambo “munsi” ryerekana ahantu na ryo ryandikwa mu ijambo rimwe.

Urugero

- Imbeba yihishe munsi y’akabati.

Amagambo “ku” na “mu”

Amagambo “ku” na “mu” yandikwa atandukanye n’ikinyazina ngenera ndetse no mu magambo “ku wa” na “mu wa” abanziriza itariki cyangwa umubare mu izina ry’umunsi.

Ingero

- Sindiho ku bwabo.
- Navutse ku wa 12 Ugushyingo.
- Azaza ku wa Mbere.
- Yiga mu wa kane.

Ijambo “saa”

Ijambo “(i)saa”, rikurikiwe n’umubare byerekana isaha byandikwa mu magambo atandukanye.

Ingero

- Abashyitsi barahagera saa tatu.
- I saa kenda nizigera ntaraza wigendere.

Imigereka ndangahantu

Imigereka ndangahantu iremewe ku ndangahantu “i” (imuhira, iheru, iburyo, ibumoso, ivure, ikambere, imbere, ibwami, inyuma...) n’amagambo akomoka kuri “i” y’indangahantu ikurikiwe n’ikinyazina ngenera “wa”, n’ikinyazina ngenga yandikwa mu ijambo rimwe.

Ingero

- Nujya iburyo ndajya ibumoso.
- Mbwirira abari ikambere bazimanire abashyitsi.
- Nuza iwacu nzishima.

Indangahantu “i” ikurikiwe n’izina bwite ry’ahantu. Iyo “i” y’indangahantu ikurikiwe n’izina bwite ry’ahantu yandikwa itandukanye n’iryo zina.

Ingero

- i Kirinda
- i Muyunzwe

Inshinga mburabuzi “-ri”

Inshinga mburabuzi “ari” iyo ikoreshejwe mu nyangingo ngaragira yandikwa itandukanye n’ikinyazina kiyibanziriza n’ikiyikurikira.

Ingero

- Itegeko rihana umuntu uwo ari we wese wangiza umutungo wa Leta.
- Ibyo ari byo byose sindara ntaje kukureba.
- Sinzi uwo ari we.

Amagambo arema inyumane

Amagambo afatiwe hamwe akarema inyumane y’umugereka, inyumane y’icyungo, cyangwa iy’irangamutima akomoka ku binyazina bitakibukirwa amazina bisimbura yandikwa afatanye. Nyamara iyo ahuje ishusho n’izo nyumane kandi ibinyazina bikerekeza ku kintu kizwi cyangwa kibukwa mu buryo bugaragara, byandikwa bitandukanye.

Ingero

- Niko? Uraza?
- Uko aya ni ko angana.
- Urahinga nuko uteza.
- Uku kwezi ni uko guhinga.
- Amutumaho nuko araza.
- Ukuboko ashaka ni uko.

Amagambo ashingiye ku isubiramo

Amagambo ashingiye ku isubiramo yandikwa afatanye.

Ingero

- Perezida yavuze ijamba arangije abari aho amashyi ngo “Kacikaci”.
- Babwire bage binjira umwumwe.
- Mugende babiribabiri.

6. Imyandikire y’amazina bwite

Amazina bwite y’ahantu afite indomo.

Amazina bwite y’ibihugu n’ay’ uturere afite indomo yandikwa atandukanye n’iyo ndomo; iyo ndomo ikandikwa mu nyuguti nto, keretse iyo itangira interuro.

- A Marangara n’i Gisaka ni tumwe mu turere twa kera tuvugwa mu mateka y’u Rwanda.
- U Rwanda rurigenga.
- U Mutara wera ibigori, ibitoki n’ibishyimbo.
- U Bubirigi buri mu majyaruguru y’uburasirazuba bw’u Bufaransa.

Amazina bwite y’abantu arenze rimwe

Amazina bwite y’abantu arenze rimwe akurikirana muri ubu buryo: Habanza izina yahawe akivuka, hagakurikiraho andi mazina y’inyongera.

Ingero

- UWASE Ikuzo Laurette

- VUBI Pierre
- KARIMA Biraboneye
- MUNEZERO Salima

Amazina bwite y’abantu n’ahantu y’amavamahanga

Amazina bwite y’abantu n’ahantu y’amavamahanga atari ay’idini n’amazina bwite y’ibihugu n’ay’uturere y’amahanga yandikwa uko avugwa mu Kinyarwanda, nyuma bagashyira mu dukubo uko asanzwe yandikwa mu rurimi akomokamo.

Ingero

- Enshiteni (Einstein)
- Shumakeri (Schumacher)
- Ferepo (Fraipont)
- Cadi (Tchad)
- Kameruni (Cameroun / Cameroon)
- Wagadugu (Ouagadougou)
- Ositaraliya (Australie / Australia)

c) Amazina y’idini

Amazina y’idini yandikwa nk’uko yanditswe mu gitabo k’irangamimerere akaza akurikira izina umuntu yahawe akivuka cyangwa izina rindi rifatwa nka ryo. Izina rya mbere ryandikwa mu nyuguti nkuru naho izina ry’idini rikandikwa mu nyuguti ntoya, ritangijwe inyuguti nkuru.

Ingero

- KARERA John
- KEZA Jane
- KAMARIZA Jeanne
- RUTERANA Abdul
- MFIZI Yohana

Amazina bwite yatanze kandi yakoreshejwe mbere y’aya mabwiriza akomeza kwandikwa uko yari asanzwe yandikwa.

Ingero

- Intara y’Amajyepfo
- Umujyi wa Kigali
- Akarere ka Rulindo
- Akagari ka Cyimana
- Umurenge wa Cyeru

7. Imikoreshereze y’utwatuzo n’ibimenyetso byihariye Utwatuzo

1. **Akabago/akadomo (.)**: Gasoza interuro ihamya n’interuro iri mu ntegeko.

Ingero

- Umwana mwiza yumvira ababyeyi.
- Utazi ubwenge ashima ubwe.
- Mpereza icyo gitabo.

2. **Akabazo (?)**: Gasoza interuro ibaza.

Ingero

- Uzajya i Kigali ryari ngo tuzajyane?
- Wabonye amanota angahe?

3. **Agatangaro (!)**: Gasoza interuro itangara, kagashyirwa n’inyuma y’amarangamutima.

Ingero

- Mbega ukuntu kino kiyaga ari kinini!
- Ntoye isaro ryiza mama weee!

4. **Akitso (,):** Gakoreshwa mu nteruro kugira ngo bahumeke akanya gato.

Ingero

- Umunyeshuri ushaka kujijuka, yirinda gusiba, ntakubagane mu ishuri kandi agakurikiza inama za mwarimu.
- Abagiye inama, Imana irabasanga.

5. **Uturegeka (...):** Dukoreshwa iyo berekana ironдора ritarangiye, interuro barogoye cyangwa iyo mu nteruro hari ijamba bacikije.

- Mu rugo rwa Kinyarwanda habaga ibikoresho byinshi: ibibindi, ibyansi, ishoka, ibitebo, isekuru...
- Baragenda ngo bagere ku Ruyenzi bahahurira na mwene... simuvuze nzamuvumba!

6. **Utubago tubiri (:):** Dukoreshwa mu nteruro iyo hari ibigiye kurondorwa, gusobanurwa cyangwa iyo bagiye gusubira mu magambo y'undi.

- Dukoreshwa kandi inyuma y'ingirwanshinga “-ti” n'ijambo “ngo”.

Ingero

- Burya habaho imirimo myinshi: guhinga, kubaka, kubaza n'ibindi.
- Mariya ati: “Ibyo uvuze bingirirweho”.
- Mu Kinyarwanda baravuga ngo: “Ifuni ibagara ubucuti ni akarenge”.

7. **Akabago n'akitso (;):** Bikoreshwa mu nteruro kugira ngo batandukanye inyangingo ebyiri ziremye kimwe kandi zuzuzanya.

Urugero

- Gusoma neza si ugusukiranya amagambo; gusoma neza ni no kumva ibyo usoma.

8. **Utwuguruzo n'utwugarizo (“ ”):** Dukikiza amagambo y'undi asubirwamo, imvugo itandukanye n'imvugo isanzwe, cyangwa ingingo igomba kwitabwaho.

Dukikiza amagambo ateruwe n'ingirwanshinga “-ti” n'ijambo “ngo”.

Dukoreshwa na none iyo hari inyito ikemangwa cyangwa kugira ngo bakikize amazina nteruro n'amazina y'inyunge agizwe n'amagambo arenze ane.

Dukoreshwa kandi mu magambo y'amatirano atamenyerewe mu Kinyarwanda.

Ingero

- Igikeri kirarikocora kiti: “Kuba mu bibuba si ko guhunika ibigega”.
- Nuko ya “nyamaswa” iravumbuka maze havamo umusore mwiza.
- Ubwo “Inshyikanya ku mubiri ya Rugema ahica” ba arahashinze.
- Ibyo nabisomye kuri “internet”.

9. **Akuguruzo n'akugarizo kamwekamwe (“ ”):** Dukoreshwa iyo utwuguruzo n'utwugarizo twinjira mu tundi mu nteruro.

Urugero

- Umugaba w'ingabo ati: “Ndashaka ko ‘inshyikanya ku mubiri ya rugema ahica’ aza hano”.

10. **Udukubo ():** Dukikiza amagambo cyangwa ibimenyetso bifite icyo bisobanura cyangwa icyo byuzuzanya mu nteruro. Banadukoresha iyo bashakira kwerekana uko amazina bwite y'amanyamahanga yanditswe mu Kinyarwanda bayandika mu ndimi akomokamo.

Dukikiza kandi umubare wanditse mu mibarwa mu nteruro iyo uwo mubare wabanje kwandikwa mu nyuguti. Twerekana n'ibihokane cyangwa inyuguti bidakunze gukoreshwa.

Ingero

- Umuyobozi w' Akarere yabwiye abaturage ko kugira ngo barwanye inzara, bagomba gushoka ibishanga (impeshyi yari yabaye ndende) kandi kwirirwa banywa bakabifasha hasi.
- Bisimariki (Bismarck)
- Koreya (Korea)
- Kamboje (Cambodge)
- Igihembo twumvikanyeho ni amafaranga y'amanyarwanda ibihumbi magana atanu (500 000 Frw).
- (l) cyangwa (vy)

11. **Akanyerezo (-)**: Gakoreshwa mu kiganiro kugira ngo berekane ihererekanywa cyangwa iyakuranwa ry'amagambo.

Urugero

- Wari waragiye he?
- Kwa Migabo.

Gakoreshwa kandi bakata ijamba ritarangiranye n'impera y'umurongo, bikurikije imiterere y'umugemo.

Urugero

Semariyota yansabye ko tuzajya-na i Rukoma, ariko sinzamwe-merera. Kanakoreshwa imbere n'inyuma y'interuro ihagitse.

Urugero

Ejo nzajya mu misa-sinzi niba wari uzi ko nsigaye nnyayo - ntuzantegereze mbere ya saa sita.

12. **Udusodeko ([])**: Dukikiza intekerezo cyangwa insobanuro bongeye mu mvugo isubira mu magambo y'undi.

Urugero

Yaravuze ati: "Sinshobora kurara ntariye inkoko [ayo yari amirariro], keretse narwaye".
Dukoreshwa kandi berekana ibyo banenga mu magambo y'undi.

Urugero

Yaranditse ati: "Ikinyarwanda ni ururimi ruvugwa n'abatu [ikosa] benshi muri Afurika yo hagati: ".
Tunakoreshwa mu magambo y'undi mu kugaragaraza ko hari ayavanywemo cyangwa yasimbutse.

Urugero

Aravuga ati: "Nimureke abana bansange [...] ntimubabuze".

13. **Agakoni kaberamye (/)**: Gakoreshwa mu kwandika amatariki, inomeru z'amategeko no mu mwanya w'icyungo "cyangwa".

Ingero

Kigali, ku wa 15/10/2012.

Itegeko N° 01/2010 ryo ku wa 29/01/2010.

14. **Agakato: ‘ :** Gakoreshwa mu gukata ibyungo cyangwa ibigenera iyo bikurikiwe n'inyajwi.

Urugero:

- Ivu n'umuriro
- Amashuri y'imyuga.

8. Imikoreshereze y'inyuguti nkuru

Inyuguti nkuru ikoreshwa aha hakurikira:

a) Mu ntangiriro y'interuro.

Urugero

- Ifuni ibagara ubucuti ni akarenge.

b) Nyuma y’akabago, akabazo n’agatangaro.

Ingero

- Twese duhagurukire kujijuka. Wabigeraho ute utazi gusoma? Ntibishoboka.
- Ntoye isaro ryiza shenge wee! Reka nge kuryereka nyogokuru.

c) Nyuma y’ingirwanshinga “-ti” n’ijambo “ngo” bikurikiwe n’utubago tubiri n’utwuguruzo.

Ariko inyuguti nkuru ntitangira amagambo asubirwamo iyo uwandika yayatangiriye hagati mu nteruro yakuwemo.

Ingero

- Kankindi arasubiza ati: “Ibyo uvuze bingirirweho”.
- Igihe Kankindi yavugaga ati: “ibyo uvuze bingirirweho”, yari yaramaze gusabwa na Kamana.

d) Ku nyuguti itangira imibare iranga iminsi, amazina y’amezi n’ay’ibihe by’umwaka.

Ingero

- Ku wa Gatanu, ku wa Gatandatu.
- Ugushyingo gushyira Ukuboza
- Mu Rwanda haba ibihe bine by’ingenzi: Urugaryi, Itumba, Iki (Impeshyi) n’Umuhindo.

e) Ku nyuguti itangira amazina bwite y’abantu, ay’inuzi n’ay’ahantu, kabone nubwo indomo itangira izina ry’ahantu yaba yatakaye.

Ingero

- Rutayisire atuye i Huye hafi ya Cyarwa.
- Mu Mutara hera ibigori.
- I Washingtoni (Washington) ni ho hari ikicaro cya Banki y’Isi.
- Uwitwa Enshiteni (Einstein) yari umuhanga cyane.

f) Ku nyuguti itangira amazina y’imirimo, ay’inzego z’imirimo n’ay’amashyirahamwe.

Ingero

- Bwana Muyobozi w’Akarere
- Minisiteri y’Ubuhinzi n’Ubworozi
- Umuryango w’Abibumbye
- Koperative Dufatanye

g) Ku nyuguti itangira amazina y’impamyabushobozi, ay’icyubahiro, ay’inzego z’ubutegetsu, ay’ubwenegihugu n’amoko, ay’indimi, ku mazina y’ibikorwa byamamaye mu mateka no ku nyuguti itangira ijambo “Igihugu” iyo rivuga u Rwanda.

Ingero

- Dogiteri Karimanzira
- Nyakubahwa Perezida wa Repubulika
- Umurenge wa Nyarugenge
- Abanyarwanda barimo Abasinga n’Abagesera
- Dukwiye guteza imbere Ikinyarwanda.
- Mu Ntambara ya Kabiri y’Isi Yose hafuye abantu benshi.

- Umwami Mutara III Rudahigwa ni umwe mu ntware z’Igihugu.

h) Ku nyuguti itangira umutwe w’inyardiko, igitabo cyangwa ikinyamakuru.

Ingero

- Nujya mu mugu ungurire *Imvaho Nshya*.
- Musenyeri Kagame Alegisi ni we wanditse *Indyoheshabirayi*.

i) Izina bwite umuntu yahawe akivuka cyangwa irindi rifatwa nka ryo riri ku ntangiriro no ku mpera y'inyandiko (nk'ibaruwa, nk'itegeko, nk'umwandiko uwo ari wo wose,...) no mu rutonde rw'amazina y'abantu ryandikwa ryose mu nyuguti nkuru. Nyamara rikandikwa mu nyuguti nto uretse inyuguti iritangira yandikishwa inyuguti nkuru mu mwandiko hagati.

Ingero

- GAHIRE Rose
- UMURISA Keza
- BUTERA Simoni
- Nagiye kwa Gahire Rose anyakira neza.

Umutwe wa kane

Umutwe wa 4: Kubungabunga ubuzima

Imiterere y'amasaku ku magambo

Hamwe na bagenzi bawe muri kumwe mu itsinda, nimusome izi nteruro, mugaragaze itandukaniro riri hagati y'imivugirwe y'amagambo y'umukara tsiri:

1. Ihene yange **itaka** ryayigiye mu jisho. Umva ukuntu **itaka**.
2. Umuntu yanika bishyimbo ku **musambi**. Uyu **musambi** ntiwona imyaka.
3. **Umuvure** wagwiriye umwana wange acika igisebe; genda **umuvure**.
4. Intore **ikamba** iyo yambaye **ikamba** ryayo ari ryo mugara.
5. **Ineza ineza** uyigiriwe.

Uko bigaragara aya magambo atandukaniye ku buryo ijwi rizamuka, hamwe ijwi rirajya hejuru ahandi rikaguma hasi.

Inshoza y'amasaku

Ntawavuga imiterere y'amasaku ku magambo y'Ikinyarwanda, atabanje kuvuga ko ubutinde bw'inyajwi n'imiterere y'amasaku bihera ku mugemo. Iyo umuntu avuze ijambo yitonze, icya mbere yiyumvisha ni imigemo igize iryo jambo, kuko buri mugemo wumvikana neza bawuvuze inshuro imwe ishyitse. Ingombajwi, inyerera n'ibihokane ntibishobora kurema umugemo batabitwerekere inyajwi. Bityo rero usanga inyajwi ari yo shingiro ry'umugemo.

Mu kinyarwanda, inyajwi iba ifite ubutinde n'imiterere y'amasaku yaremanywe. Iyo utabikurikije mu mvugo, uba ushyomye cyangwa se rimwe na rimwe ukaba uvuze irindi jambo utashakaga kuvuga cyangwa ukaba uvuze ijambo ritabaho.

Mu kinyarwanda amagambo ashobora guhuza ishusho cyangwa imisusire, ariko ntahuze ibisobanuro biturutse ku kudahuza ubutinde n'imiterere y'amasaku.

Urugero: inkoko (itungo) ≠ inkoko(bagosoreraho), umusambi (inyoni) ≠ umusambi (bicaraho)

Ubutinde n'imiterere y'amasaku by'inyajwi bifite agaciro kuko imihindagurikire yabyo ishobora gutuma igisobanuro k'ijambo gihunduka. Twibuke ko mu Kinyarwanda:

- **Inyajwi ibangutse yandikwa n'inyajwi imwe.**

Urugero: umuriro, akagabo, urugo, ikibonezamvugo

- **Inyajwi itinda yandikwa n'inyuguti ebyiri zivugwa kimwe.**

Urugero:

aa: araaje, icyaanzu
ee: umukeenke, ikireere
ii: umuriizo, ubwiira
oo: umwoobo, kugooro
uu: ishuuri, kuvuura

Amoko y’amasaku

Mu Kinyarwanda isaku nyesi riri ku nyanjwi nta kimenyetso kirigaragaza ariko isaku nyejuru riri ku nyajwi rigaragazwa n’akamenyetso gateye nk’akagofero (^). Inyajwi ibangutse ishobora kugira isaku nyesi cyangwa se isaku nyejuru. Naho injajwi itinda, yandikwa n’inyajwi ebyiri zisa, ishobora kugira amasaku nyesi nyesi, nyesi ngejuru cyangwa nyejuru ngesi.

Iyo ushaka kumenya ubutinde n’imiterere y’amasaku by’inyajwi ziri mu ijambo, usa nuvugiriza ukurikije imvugo y’iryo jambo kandi ugaragaza imigemo irigize. Ubutinde n’imiterere y’amasaku bizagaragara ku mugemo uyu n’uyu bizaba ari ubutinde n’imiterere y’amasaku by’inyajwi iri muri uwo mugemo.

Kwandika amasaku ku magambo

Amasaku ashobora kwandikwa ku magambo hakoreshejwe “muhundwanota”. Muhundwanota ni uturongo tubiri tutambitse kandi duteganye, ducibwa hejuru y’ijambo. Muri utwo turongo tubiri niho bashushanyiriza imivugirwe y’iryo jambo bitewe n’uko imigemo irigize ivugitse.

a) Iyo injajwi ibangutse ifite isaku nyesi cyangwa se isaku nyejuru.

Iyo umaze guca uturongo tubiri dutambitse hejuru y’ijambo injajwi ibangutse ifite isaku nyesi igaragazwa n’agasharu gato gatambitse hejuru y’iyo nyajwi, gakurikiye akarongo ko hasi; injajwi ibangutse ifite isaku nyejuru igaragazwa n’agasharu gato gatambitse hejuru y’iyo nyajwi, gakurikiye akarongo ko hejuru.

Ingero:

amasaku yo hasi

amasaku yo hejuru

- - - - -

umugezi

- - - - -

umudaho

- - - - -

umutaka

- - - - -

inka

b) Inyajwi itinda ifite isaku nyesi igaragazwa n’agakato karekare hejuru y’iyo nyajwi gakurikiye umurongo wo hasi.

Naho injajwi itinda ifite isaku nyejuru ngesi, iba ifite isaku nyejuru ry’integuza riba riri ku nyajwi iri ku mugemo ubanziriza uwo iyo nyajwi itinda iba irimo. Mu gihe injajwi itinda ifite isaku nyesi ngejuru nta saku nyejuru ry’integuza igira. Ivugika ku buryo basa n’abazamura ijwi bahereye ku ntangiriro y’iyo nyajwi kugera ku mpera yayo.

Ingero:

-inyajwi itinda ifite isaku nyesi kuri muhundwanota igaragazwa itya:


- - - - -

Umuganda

- - - - -

umweyo

-Inyajwi itinda ifite isaku nyejuru ngesi kuri muhondwanota igaragazwa itya:




Urukundo




Ikigori

-Inyajwi itinda ifite isaku nyesi ngejuru kuri muhondwanita igaragazwa itya:



Urutonde




Icyatsi


c) Hari ubwo injajwi itinda igira isaku nyejuru ku ntangiriro yayo (bityo ikagira isaku nyejuru ry'integuza) kandi igakurikirwa n'umugemo urimo injajwi ifite isaku nyejuru.

Icyo gihe rya saku nyejuru riri ku nyajwi yo mu mugemo ukurikira injajwi itinda, rigira isaku nyejuru ry'integuza ku mpera y'iyi nyajwi itinda. Ibyo bituma imivugirwe y'iyi nyajwi itinda ikomeza guhanika kugera ku mivugirwe ya ya nyajwi ili mu mugemo ukurikiraho.

Urugero:



Umusave



Uruhira

Biragaragara ko kuri muhondwanota, amajwi y'Ikinyarwanda afite ubutinde n'imiterere y'amasaku bitandukanye. Hari mu amajwi adatinda abangutse, amajwi atinda, amajwi afite amasaku yo hasi n'amasaku yo hejuru, amajwi atinda afite amasaku nyesi nyesi, nyesi ngejuru na nyejuru ngesi. Mu nyandiko isanzwe itagabanya ibimenyetso, amajwi ariho amasaku yandikwa ashyizweho akagofero (^). Ni ukuvuga ku majwi afite amasaku nyejuru ndetse no ku majwi y'integuza.

Ingero:

- Umugezi, umûdâho - Umutaka, inkâ
- Umugaanda, umweeyo - Urûkûundo, ikîgôori
- Urutoônde, icyaâtsi - Umûsââvê, urûhîrâ

Mu myandikire y'amasaku ku magambo kandi hari uburyo bwo kwandika amasaku busanzwe bwo kugabanya ibimenyetso. Icyo gihe amasaku ashyirwa ku majwi afite amasaku gusa naho amajwi y'integuza ntashyirweho amasaku.

Ingero:

- Umugezi, umudâho - Umutaka, inkâ - Umugaanda, umweeyo
- Urukûundo, ikigôori - Urutoônde, icyaâtsi - Umusââvê, uruhîrâ

4.3. Ubutinde n'imiterere y'amasaku mu nteruro

Amasaku mbonezanteruro

Mu nteruro habamo amagambo ahindura amasaku kamere y'ayandi magambo bihuriye muri iyo nteruro. Bene ayo masaku mashya, bayita amasaku mbonezanteruro.

Ingero z'amasaku mboneza nteruro

- Ibyungo “na” na “nka”, ibinyazina ngenera n'akajambo “nyira” iyo bikurikiwe n'izina ridafite indomo, ariko rifite isaku nyejuru ku mugemo wa gatatu, icyo gihe ayo magambo atuma haza isaku nyejuru ku mugemo wa mbere w'iryo zina.

Ingero

- Shyoroongi na Kîgalî bireegeranye.
- Ngeenda na Bûtamwâ biri kure.
- Ruhaango ya Gîtarâma iri kure.

- Iyo ibyungo “na” na “nka”, n'ibinyazina ngenera n'akajambo nyira bikurikiwe n'izina ridafite indomo kandi ridafite isaku nyejuru, nta gihinduka kuri iryo zina. Iyo ayo magambo akurikiwe n'izina ridafite indomo rikagira isaku nyejuru ku mugemo wa kabiri ariko riri ku nyajwi ya kabiri y'ubutinde, iryo saku rirahaguma hanyuma hakaza irindi saku nyejuru ku mugemo wa mbere.

Ingero

- Karimuunda na Mûsaâre
- Rukara na Mûraâmbi
- Akazaamuukana na Rwîntaâshya

- Iyo isaku nyejuru riri ku nyajwi ya mbere y'ubutinde nta gihinduka

Ingero

- Muraâmbi na Zâaza
- Daatâ na mwâana

- Iyo bikurikiwe n'izina ridafite indomo ariko rifite isaku nyejuru ku mugemo wa kabiri bituma rya saku ryimuka rikajya ku mugemo wa mbere.

Ingero

- Maara ya Bûtare
- Kagabo na Gâsore
- Ngarama ya Gâtsibo

- Buri gihe nyuma yo gufata indomo ikurikira ayo magambo akatwa ihita ifata isaku nyejuru.

Ingero

- Umusôre n'ûmukoôbwa.
- Amatâ y'âbakinnyi.

Ikitonderwa

- ✚ Iyo izina rikurikiye icyungo cyangwa ikinyazina ngenera gikase rifite isaku nyejuru ku mugemo wa kabiri bituma indomo y'iryo zina igira ubutinde bufite isaku nyejuru ku nyajwi ibanza.

Ingero

- Ukwêezi n'îzûuba
- Igikiniisho cy'ûumwâana

✚ Iyo kuri ubwo butinde nta saku nyejuru rihari, indomo ikurikiza amagambo akase igira ubutinde ariko noneho isaku nyejuru rikajya ku nyajwi ya kabiri y'ubwo butinde.

Umutwe wa gatanu

Umutwe wa 5: Kubungabunga Ibidukikije

Ikomorazina mvazina

Sesengura amazina ari mu nteruro zikurikira ugaragaza amazina mbonera gakondo n'andi atari mbonera kandi ugerageze gusobanura imiterere yayo:

Kalisa yagiye gutora udukwi mu gashyamba ko mu gacyamo.
Yiyumvagamo ubugabo bwo guhangana n'ibinyabwoya.
Abasizi bakunda gukoresha imvugoshusho Databukwe na Sobukwe ni inshuti nyanshuti. Amasaka ya nyiragikori avamo igikoma kiryoshye.
Twagiye kubona nyamuntu arahahingutse. Umwana wa samusure avukana isunzu.
Shabukuru ni indwara itavurwa. Wari wajya mu rwingwe? Oya, aho nageze ni mu rwimbogo. Umwamikazi n'umugabekazi bari abagore bakomeye ibwami.
Uriya mugabo yahishije akayogazi.

Inshoza y'ikomorazina mvazina

Ikomorazina mvazina ni ihimba ry'amazina mashya uhereye ku bicumbi by'andi mazina asanzwe mu rurimi.

Inzira z'ikomorazina mvazina

a) Ikomorazina mvazina ripfobya

Ni iryongera ku ngingo isanzwe indi ngingo igaya nk'iy'ubunini, ubuto, ububi bukabije...

Ingero

- Inka → agaka → igika → uruka
- Umugabo → akagabo → ikigabo → urugabo

b) Ikorazina ryitirira

Ni irihimba amazina mashya, rishingiye ku masano y'ingenzi ayo mazina afitanye n'ayo akomokaho.

Ingero

- Umwarimu → ubwarimu
- Igitebo → ubutebo
- Igitoki → urutoki
- Umugano → urugano
- Umucaca → urucaca
- Umwangavu → ubwangavu

c) Amazina afite ibicumbi bifatanye n'indangazina

Ni amazina usanga afite indagazina ebyiri:

Indangazina ya mbere ni yo igaragaza inteko iryo zina ririmo, naho iya kabiri ikaba ari iy'izina nyakimwe

iryo zina rikomokaho.

Ingero

- Ijisho → Akajisho → ikijisho

- Umuntu → ubumuntu

- Ubugabo → akanyabugabo

d) Amazina y'inyuge aranga amasano

Ni amazina yiyunga akaba izina rimwe riranga isano abantu bafitanye mu muryango. Ayo mazina yashyizwe muri iki kiciro kubera ko abashakashatsi basanze ayo mazina agizwe n'amazina abiri yagiye ahindura intego ku buryo butandukanye.

Ingero

- Databukwe = data-ubukwe: \emptyset - \emptyset -data- \emptyset -bu-ko-e o → w/-J

- Mabukwe = mama-ubukwe: \emptyset - \emptyset -ma- \emptyset -bu-ko-e o → w/-J

- Sobukwe = so-ubukwe: \emptyset - \emptyset -so- \emptyset -bu-ko-e o → w/-J

- Nyokobukwe = Nyoko-ubukwe: \emptyset - \emptyset -nyoko- \emptyset -bu-ko-e o → w/-J

Ikitonderwa:

Aya mazina yose ari mu nteko ya mbere. Ntabwo afite indomo n'indanganteko, inteko yayo igaragara iyo bayashize mu nteruro.

Urugero

- Databukwe ni munini

e) Amazina akomoka ku tubimbura

Akabimbura ko mu mazina ni akaremajambo k'amagambo agoragozwa kaza mbere y'indanganteko cyangwa mbere y'igicumbi kakagira intego zitandukanye.

Utubimbura tw'ingenzi two mu mazina ni tune: a-; -nya; -nyira; -sa/sha

i) Akabimbura nyira

➤ Karema:

✓ *Amazina y'amasano akurikira:* Nyirabukwe, nyirabuja, nyirasenge.

✓ *Amazina bwite y'abantu b'igitsina gore:* Nyirabagenzi, Nyirangirente, Nyirahabimana...

✓ *Amazina rusange:* Nyiramasibira, nyiragikori.

➤ Kajya imbere y'ibicumbi by'amazina. Gafite umumaro wa ngenera

Ingero

- Umunyakigali,

- Umunyabintu,

- Ba nyakabyizi.

➤ Kagira inyito yo kwibutsa

Urugero

- Tugiye kubona tubona nyamugore araje.

➤ Kagira inyito ihamya

Ingero

- Dutere intambwe nyantambwe.

- Inshuti nyanshuti.

- Inka nyanka.

ii) Akabimbura sa ni impuzanyito ya nya

Karema amazina bwite	Sabizeze, Sagihobe, Sagitwe...
Karema amazina rusange	Agasamunyiga, Samusure...
Gashobora kugira impuzantego sh	Shabukuru

iii) Akabimbura -a

Gafitanye isano n'ikinyazina ngenera. Kabanziriza indanganteko cyangwa indomo.

Urugero

- Rwimbogo → ru-a-i-n-bogo

f) Amazina afite inyongera cyangwa umusuma

Umusuma ni akajambo kiyongera inyuma y'igicumbi k'izina kakaryongerera ingingo y'igitsina gore, yo gutubya cyangwa yo gusebya.

- **Umusuma-kazi** ufite inyito y'igitsina gore

Ingero

- Inkokokazi
- Umugabekazi
- Umunyarwandakazi

- **Umusuma -rume** usobanura igitsina gabo

Ingero

- Isekurume
- Marume

- **Umusuma -azi** ukoreshwa mu kugaya agaciro k'umuntu cyangwa k'ikintu.

Ingero

- Ikintazi/ Ikintagazi
- Uruntagazi
- Akayogazi

g) Amazina afite igicumbi gisubiwemo

- **Igicumbi gisubiwemo cyonyine**

Ingero

- Igikobokobo
- Ikigorigori
- Igishakashaka
- Insoresore
- Umugwegwe
- Ikigwagwa

- **Igicumbi gisubiranywemo n'indanganteko**

Urugero

- Urunturuntu

- **Ibicumbi bisubiwemo bifite inyunga -a hagati yabyo**

Ingero

- Ingeragere
- Ivumavuma
- Intokatoki
- Umusangasange

Amoko y'imyandiko

Nimusome umwandiko “Umutungo w'amazi ukwiye kubungabungwa” maze mugaragaze ibice biwugize muhereye ku bika biwugize, ibivugwamo n'uburyo bivugwamo. Nimugereranye uyu mwandiko n'ingeri z'ubuvanganzo bwo muri rubanda muhereye ku kivugwa, ikigamijwe n'uburyo bivugwamo. Duhereye ku buryo ibitekerezo biri mu mwandiko bitondetse no ku buryo bwo gusesengura ikivugwa, imyandiko ishobora kugabanywamo amoko atanu ari yo: umwandiko mbarankuru, umwandiko mvugamateka, umwandiko nsesengurabumenyi, umwandiko mvugamiterere n'umwandiko ntekerezo.

1. Umwandiko ntekerezo

Uyu mwandiko “Akamaro ko gusoma” murasanga umwanditsi yarwanditse agamije iki? Ugereranyije n'umugani muremure urasanga mu miterere yayo itandukanira he? (intangiriro, uko ibitekerezo bikurikirana n'umusozo)

Inshoza y'umwandiko ntekerezo

Umwandiko ntekerezo ni umwandiko ugambiriye gutanga ibitekerezo ariko noneho bigomba gusobanurwa, kugaragazwa n'ingeri, ndetse n'ibipimo by'imibare n'ubundi bumenyi. Uwandika bene uwo mwandiko agomba gutanga ibisobanuro bifatika kuri buri gitekerezo atanze, akerekana ko hari abandi babibonye nka we, akagaragaza n'inkomoko y'ibyo uvuga; kuko aba agambiriye ko babyemera.

Urugero:

Uramutse ufite insanganyamatsiko yo kuvuga ku ishyamba rya Nyungwe, ushobora: kubara inkuru iryerekeyeho, kuvuga amateka yaryo, kuvuga imiterere yaryo urishimagiza cyangwa ugira ibyo unenga, gusesengura aho riri ku ikarita, impamvu habamo amoko y'ibiti ibi n'ibi, akamaro rifitiye u Rwanda n'isi, ... Imyandiko ntekerezo rero ni yo yagiye ihindura isi kuko akenshi yibasira igitekerezo rusange, gishobora kuba kemewe na benshi kandi kimaze igihe, nyamara wenda atari cyo, cyangwa kikaba kitakijyanye n'ibihe. Bityo, iyo ibivugwa bigaragaye ko ari ko kuri, bihindura byinshi ku bantu no mu mibereho yabo. Umwandiko ntekerezo uba ugambiriye kwemeza abandi igitekerezo cyawe, no gutuma bahindura icyo bo bari bafite. Kugira ngo rero ubigereho witwerereza ubumenyi bwose. Bityo rero muri wo dushobora gusangamo agace kavuga amateka, akabara inkuru, agasesengura ibintu mu buryo bwa gihanga, ... ariko byose bigambiriye kwerekana ukuri kw'igitekerezo ushyigikiye.

Amabwiriza yo guhanga umwandiko ntekerezo

Guhanga umwandiko ntekerezo ni ugutanga ibitekerezo uhitamo uruhande ubogamiraho ku nsanganyamatsiko yatanze, wabanje kwiga ikibazo, ukifashisha ingingo zumvikana kandi zifatika ndetse ziherekejwe n'ingeri. Insanganyamatsiko ishobora kuba ijyanye n'iby'umuco, ubukungu, poritiki, imibereho y'abaturage, iyobokamana, ubutabera n'ibindi.

Insanganyamatsiko ushobora kuba wayihawe cyangwa wayitekererejeho. Insanganyamatsiko ni ikintu k'ingenzi kigomba kwitonderwa, kuko ibyandikwa ni cyo biba bishingiyeho, kandi uburyohe bw'umwandiko buturuka ku nsanganyamatsiko n'uburyo wayambitse.

Nubwo buri muhanzi agira inganzo ye mu buryo bwo kuryoshya igihangano, hari ibikorwa by'ingenzi agomba gukurikiza kugira ngo umuntu aboneze igihangano ke. Ayo mahame ni ugutekereza cyangwa kumva insanganyamatsiko, kwegeranya ingingo, guhitamo inzira, gukora imbata no kwandika.

a) Gutekereza no kumva insanganyamatsiko

Mbere yo kwandika ubanza gutekereza ku nsanganyamatsiko ushaka kwandikaho, ukayiyumvisha, ukayigira iyawe, cyanecyane iyo ari iyo wahawe. Kumva ingingo wandikaho bikorwa mu byiciro bibiri:

- Kuyisoma witonze, ukayisesengura, ushaka inyito z'amagambo ayigize kuko ijamba rimwe rishobora kugira inyito nyinshi.

- Gushakamo ijambo cyangwa amagambo fatizo yaguha inzira n'imbibi y'insanganyamatsiko. Iyi ntambwe ya mbere ni ingenzi kuko ntushobora kubona ibitekerezo utanga ku bintu nawe ubwawe utumva neza.

b) Kwegeranya ingingo (ibitekerezo)

Iyo umaze kumva neza insanganyamatsiko, utangira kwandika ku rupapuro rwo guteguriraho ibitekerezo. Ukusanya ingero, amagambo meza yavuzwe n'abandi, ibyawe ubwawe waba uzi, n'ibindi. Biba byiza iyo insanganyamatsiko wandikaho uyizihohoye byinshi, kandi ugashingira ku bintu bifatika. Iyi ntambwe ya kabiri na yo irakomeye kuko ari yo igufasha gukurikiranya neza ibitekerezo byawe, ugahitamo iby'ingenzi, ukegeranya ibihuye, ukabikurikinya mu buryo bwuzuzanya kandi hakurikijwe inyurabwenge.

c) Guhitamo inzira (guhita uruhande ushyigikira)

Mbere yo kwandika ugomba guhitamo imwe mu nzira eshatu zishoboka: niba igitekerezo gikubiye mu nsanganyamatsiko ari cyo uragishyigikira, niba Atari cyo uragihinyuza, niba ubona nta ho wabogamira ujya hagati no hagati ugatanga igitekerezo kidafite aho kibogamiye, ariko gikosora impande zombi: urw'abakirwanya n'urw'abagishyigikiye. Niba insanganyamatsiko yatanze ari ikibazo, ushaka uburyo wagisubiza uhereye ku ngingo wegeranyije. Mu rwego rwo gutanga ibitekerezo biboneye ni byiza kwita cyane ku ngingo zishyigikira ibitekerezo byawe cyangwa byatanze no ku ngingo zivuguruzanya ibitekerezo. Iyi ntambwe irakomeye kuko ari yo yerekana aho ibitekerezo byawe bigana kandi guhitamo inzira ni byo bikurinda kujandajanda, bikanagaragaza ko ufite ubushobozi bwo guhagarara ku byo wemera.

d) Gukora imbata

Imbata y'umwandiko igira ibice bitatu by'ingenzi:

- Intangiriro.
- Igihimba.
- Umusozo (umwanzuro).

Intangiriro

Muri iki gice hashyirwamo ibikubiye mu nyandiko n'inyungu bayitezeho, ibice by'ingenzi bikubiye mu nyandiko yawe n'impamvu ugiye kwandika.

Intangiriro igomba kuba yujuje ibi bikurikira

- Kuba ari ngufi, ifite ireme, yanditse ku buryo uyisomye agira amatsiko yo gusoma ibikurikiyeho.
- Mu ntangiriro, ntugomba kunyura kure cyane; ugomba guhita umenyeshya icyo ugiye kwandikaho.
- Mu ntangiriro, ntugomba guhita werekana uruhande ubogamiyeho ku nsanganyamatsiko, kuko waba umaze amatsiko abasoma, ntibakomeze gusoma.

Igihimba

Ni igice kivuga ku nsanganyamatsiko ku buryo burambuye. Iki gice kerekana ibitekerezo n'ingingo zinonosora kandi zumvikanisha uruhande nyiri ukwandika ashigikiye. Kubera uburebure bw'igihimba, n'ibitekerezo binyuranye bikigize, iki gice kigenda kigabwamo ibika. Ku ntangiriro ya buri gika, hajya ijambo rigihuza n'icyakibanjirije, ku buryo hagaragara uruhererekane rw'ibitekerezo. Ibyo bikorwa no hagati y'intangiriro n'igihimba, ndetse no hagati y'igihimba n'umusozo.

Ayo magambo yunga igika ku kindi ni nk'aya:

- Nk'uko tumaze kubivuga haruguru,
- Nyamara,
- Bitabangamiye ibyo tumaze kuvuga,
- Bityo rero,

Ikitonderwa

Inzira wahisemo, ntihita igaragara mu ntangiriro y'igihimba. Ahubwo igenda iyobora ibitekerezo byawe, yumvikana ku buryo buziguye mu bitekerezo, mu ngero, mu magambo yavuzwe n'abandi usubiramo,... Buri ngingo y'ingenzi, igenda yiharira igika.

Hari igihe ikibazo cyagira ibisubizo cyangwa ibitekerezo bibiri. icyo gihe ubanza kwigizayo icyo utemera (kugisenya), kitajyanye n'inzira yawe, hanyuma ukabona gukurikizaho igitekerezo wowe ushyigikiye.

Urugero

Bamwe bavuga ko isi n'ibiyirihho bitaremwe n'Imana. Nyamara, iyo witegereje ubuhanga byaremanywe ntiwabura kuvuga ko ababitekereza batyo bibeshye. Ntukagaruke ku gitekerezo wavuze kuko ingingo zigenda zikurikirana ukurikije ingufu, inyurabwenge n'injyabihe ku buryo ugenda wumvisha umusomyi inzira yawe kandi uyimwemeza.

Umwanzuro

Umwanzuro ni igice kerekana ku mugaragaro uruhande rw'umwanditsi ku kibazo cyavuzwe mu intangiriro. Nta ngingo nshya izamo. Iki gice gishobora gufata intego zikurikira:

- Kwanzura ibitekerezo byawe muri make.
- Kwagura amarembo ku bandi banditsi, ngo bazakomerezeho, bagusubize cyangwa kuzuze.

e) Kwandika

Kwandika, ntibikorwa umujyo umwe, ndetse iyo ari ngombwa byafata n'iminsi, kugira ngo ushobore kwandika utuje neza. Nyuma rero usubira mu byo wateguye, ugakuramo ibitari ngombwa, ibyisubiramo, ibikabya, ndetse ukongeramo ibyaba bibuzemo. Muri iki gice kandi, ni ho ushakisha amagambo yabugenewe kandi aryoshye. Byongeye kandi uboneraho ugakosora amakosa y'imyandikire n'utwatuzo. Mu nyandiko, ntugatinye gushyiramo ibitekerezo n'ingero zishimishije, izisekeje, ariko byose bigusha ku byo wiyemeje kwigisha.

2. Umwandiko mbarankuru

1. Inshoza y'umwandiko mbarankuru

Umwandiko mbarankuru ni igihangano gishingiye ku kubarira abandi ibyabaye ubivuye imuzingo ukagera ku ndunduro; ariko mu buryo bworoheje butarimo isesengurabitekerezo ryimbitse, ridacukumbura insanganyamatsiko nyinshi. Kubera ko gusobanura inkuru byatugora tutabanje kuvuga ku buryo butandukanye bukoreshwa n'umuntu mu kugeza ku bandi ibitekerezo bye, reka tubanze tuvuge kuri ubwo buryo muri make. Ubwo buryo bushobora gukoreshwa ni imvugo y'ibiganiro hamwe n'inkuru.

2. Uturango tw'umwandiko mbarankuru

Imvugo y'ibiganiro

Iyo tuvuga tunganira, iyo twandika ibaruwa, iyo dutanga ibitekerezo ku ngingo iyi n'iyi, dukoresha uburyo bw'imvugo bwitwa imvugo y'ibiganiro, kuko haba hari uvuga n'ubwirwa.

Ubwo buryo bwo kuvuga cyangwa imyandiko ikozwe muri ubwo buryo, bugaragazwa mbere na mbere n'ibihe inshinga zitondaguwemo: indagihe, impitakare, n'inzagihe.

Izo nshinga zerekana igihe igikorwa cyabereye ugereranyije n'igihe bavugira. Ibyo bihe kandi bigaragaza uvuga uwo ari we n'ubwirwa mu gihe iki n'iki. Hashobora no gukoreshwamo impitakera ndetse n'indagihe y'ubusanzwe, ariko nta mpitagihe yonyine ishobora kuzamo.

Imvugo y'ibiganiro ishingiye ku gutanga ibitekerezo, ikanarangwa n'ibi bikurikira:

- Ibinyazina ngenga bigaragaza uvuga n'ubwirwa (ngenga ya mbere n'iya kabiri mu bumwe cyangwa mu byinshi).
- Amagambo agaragaza igihe n'ahantu: Hano, none, ejo, mu minsi ibiri iri imbere, mu mwaka utaha, ... Amagambo agaragaza ibitekerezo by'uvuga uruhande abogamiyemo, n'ibindi.

Aho imvugo y'ibiganiro igaragarira cyane:

Mu byegeranyo ntekerezo: aho umuntu aba agambiriye gutanga igitekerezo ke cyangwa isesengura yakoze ku bintu ibi n'ibi agamije kwerekana aho ukuri guherereye.

Ingero

- Nge ndabibona gutya,
- Ndemeza ko, ...

Mu masengesho no mu mitoma: aho nyakuvuga asaba nyakubwirwa ibintu ibi n'ibi, akamuhimbaza, amutaka, amuryarya; ndetse akiha inshingano n'amasezerano y'ibyo azamukorera.

Ingero

- nzagukunda,
- nzagutonesha nguteteshe,...

Mu ikinamico: Aho abantu bagirana ibiganiro bavugana imbonankubone.

Mu masesengura y'ibinyamakuru, mu bisigo birimbwa, mu ndangamatwara y'imitwe ya poritiki (aho umuntu agaragaza ibyo yemera n'ibyo atemera, ibyo azakora naramuka atowe,...), mu bisingizo, Mu mabaruwa: aho umuntu asaba cyangwa akagira icyo ageza kuri mugenzi we.

Mu nkuru, hari igihe umwanditsi ahitamo kutigaragaza mu byo avuga, ibyabaye bisa n'aho byivugaga byo ubwabyo, nta sano igaragara bifatanye n'uvuga, n'umwanya avugiramo.

Ubwoburyo bwokugeza ku bandi ibyabaye cyangwa ibyo utekereza utabigaragayemo ni bwobwitwaga **inkuru**. Imyandiko ikozwe ku buryo bw'inkuru, irangwa n'impitakera nk'igihe k'ibikorwa. Nta mpitakare igaragaramo. Uvuga yirinda kugaragaza igitekerezo ke, nta ho anenga cyangwa ngo ashime ibyabaye.

Aho uburyo bw'inkuru bukoreshwa

Imvugo y'inkuru igaragarira cyane mu myandiko y'abanyamateka, mu nkuru ngufi cyangwa ndende, mu migani, mu bitekerezo, ...

Ikitonderwa:

Mu mwandiko umwe ntihabura kugaragaramo isimbuzana ry'izo mvugo zombi. Ibyo bigaragara nk'iyo mu nkuru rwagati nyiri ukuyibara ashyizemo ikiganiro, umuntu umwe avugisha mugenzi we akamusubiza, cyangwa nk'igihe mu ibaruwa, uwanditse agera aho akabarira inkuru uwo yandikiye.

Uburyo bwo kubara inkuru

Buri nkuru iba yubakiye ku bintu bibiri by'ingenzi: Ku ruhanda rumwe hari amateka y'ibyabaye, ababigizemo uruhare, mu gihe iki n'iki n'ahantu aha n'aha.

Ku rundi ruhanda, hari imyubakire y'umwandiko (uburyo bwo kubara ibyo byabaye), bujyana n'uburyo uhitamo kuvuga ibyabaye cyangwa ibyo utekereza.

Uvuga

Ntihagomba kwitiranywa umwanditsi (umuntu uzwi wabayeho cyangwa ukiriho), n'umubazi w'inkuru ugaragara mu mwandiko nk'aho ari umuntu ufite ubushobozi budasanzwe.

Umwanya w'ubara inkuru

Ni uruhare afite mu nkuru abara. Ashobora kubara inkuru afitemo uruhare nk'umunyarubuga cyangwa akayibara atari mu rubuga; adafite uruhare mu byabaye. Dore aho abo babarankuru bombi batandukaniye.

Ubara inkuru adafitemo uruhare

Icyo gihe umwanditsi avugaga ibyo abandi banyarubuga bakoze, adafitemo uruhare, ku buryo atagaragaramo yivugaho, cyangwa ngo atange ibitekerezo. Iyi nkuru turangije gusoma yinjira muri urwo rwego.

Ubara inkuru ari n'umunyarubuga

Bene uwo munyarubuga aba avugaga ibyamubayeho cyangwa ibyo we ubwe yagizemo uruhare cyangwa agatanga ibitekerezo abiyerekeje. Ubu buryo bukunze gukoreshwa mu bitabo by'abantu bavugaga ku buzima bwabo.

b) Imiterere y’umubarankuru

Ashobora gufata imiterere itandukanye bitewe n’ubushobozi afite bwo kugera aho inkuru ibera hose no kumenya ibyabereye ahantu aho ari ho hose cyangwa ubwo bushobozi bukaba bufite aho bugarukira.

Kubera izo mpamvu, ubara inkuru ashobora kwitwara ku buryo

butatu butandukanye ari bwo: umubarankuru ubona byose (umumenyabyose), umubarankuru urebera imbere mu rubuga (utarenga urubuga), n’umubarankuru urebera hanze y’urubuga (utabona ibiri imbere mu rubuga).

▪ Umubarankuru ubona byose

Ibyo uwo mubarankuru avuga biba birenze ubumenyi n’ubushobozi bw’abanyarubuga. Ntagira umwanya umwe wihariye, abivuga nk’umunyamateka uzi byose, uhindura umwanya n’uburyo abonera mu byo avuga. Ashobora kuvuga ibyabereye ahantu aho ari ho hose: mu ijuru, ikuzimu, n’ahandi ; akagaragaza ibitekerezo biri mu mitima, ibyabayeho kera n’ibizaza. Ubwo buryo butanga inzira yagutse yo gusesengura insanganyamatsiko mu gitabo, ariko bushobora gutuma bigaragara nk’aho atari ukuri kuko buteganya umubarankuru ufite ubushobozi n’ububasha burenze ubwa muntu.

▪ Umubarankuru urebera imbere mu rubuga gusa

Amakuru atanga ntarenga ubumenyi n’ubushobozi bw’umuntu. Ibyo avuga ntibirenga ubushobozi bwite bwo kugera ku bivugwa.

Ubwo buryo butuma hari ibyo utabona uko uvuga, ariko bugatanga ibintu bishobora kwemerwa nk’ukuri, kuko bugarukira ku byashoborwa n’umuntu bityo usoma akabyumva mu buryo bumworoheye.

▪ Umubarankuru urebera hanze y’urubuga

Amakuru atangwa n’umubarankuru aashingira gusa ku byo abonera inyuma. Nta sesengurabitekerezo rijyamo kuko aba atazi ibitekerezo biri mu mitima y’abanyarubuga. Ubwo buryo bukoreshwa cyane mu ntangiriro y’inkuru cyangwa mu kuvuga imiterere y’inyuma y’umunyarubuga. Ntabwo bikwiye rero guhitana wemeza ko uburyo bwakoreshejwe mu gace k’inkuru ari bwo bwakoreshejwe mu nkuru yose mu gitabo. Nk’ibabarankuru rirerebera hanze y’urubuga rikoreshejwe kenshi mu ntangiriro gusa, ahasigaye hagakoreshejwe ubundi buryo butuma hasesengurwa insanganyamatsiko zitandukanye.

3. Umwandiko mvugamiterere

1. Inshoza y’umwandiko mvugamiterere

Ni umwandiko uvuga imiterere y’ikintu, ukaba ugambiriye gutanga ishusho yacyo. Nyiri ugukora uwo mwandiko yivugira ibintu uko abibona. Ashobora kuvuga ibyiza aho abandi babona ibibi, cyangwa akabona ko icyo abandi bita kiza kuri we ari inenge. Nta wamusaba kwisobanura ku gitekerezo ke.

2. Uturango tw’umwandiko mvugamiterere

Umwandiko mvugamiterere urangwa n’imvugoshusho zikoreshwa ndetse n’amagambo avuga imiterere cyane cyane ataka ikivugwa, agaragaza ubwiza bwacyo.

4. Umwandiko mvugamateka

Inshoza y’umwandiko mvugamateka

Ni umwandiko wibanda ku gukurikiranya neza ibyabaye mu gihe cyashize, ugambiriye kubimenyesha abatarabibonye cyangwa kwibutsa ababibonye ariko batakiyibuka. Wibanda rero ku kubikurikiranya neza mu gihe, ukavuga ababigizemo uruhare, icyabiteye n’ingaruka byagize

5. Umwandiko nsesengurabumenyi

1. Inshoza y’umwandiko nsesengurabumenyi

Umwandiko nsesengurabumenyi ni urubuga rwo gutuma abantu barushaho gusangira amakuru agamije guhanga cyangwa kwimakaza ubumenyi. Ni umwandiko ugambiriye kwigisha no gutanga ubumenyi, wibanda ku mibare, ugaharanira gutanga ibisobanuro nyurabwenge uhereye ku bipimo n’ibigereranyo by’imibare. Inyandiko wakubira muri iri tsinda ni imyandiko irebana n’ubushakashatsi buba bugamijwe gutangazwa.

Urugero

Gufata ikirahure kimwe cya divayi ku munsu bishobora kugabanya ibyago byo kurwara kanseri.

2. Intego y’umwandiko nsesengurabumenyi

- Kumenyeshya amakuru y’ibyagezweho mu bushakashatsi, igitekerezo gishya, ubumenyi bushya, uburyo bushya bwo gukora ibintu, igisubizo kinyuranye n’icyari gisanzweho...
- Gutanga isesengura ry’ibyerekeranye n’imibanire y’abantu hakoreshejwe inyurabwenge.

3. Uturango tw’imyandiko nsesengurabumenyi

Insanganyamatsiko ivugwaho isobanutse. Guhera ku biriho abantu basanzwe bazi, bamenyereye, ukagaraza ibishya kugira ngo umwanzuro bigaragare ko ufite ireme kandi wumvikane neza.

Imyandikire inoze, ibitekerezo bikurikiranye neza. Gukoresha imibare, ibimenyetso, inganyagaciro.

Umwandiko udafite uruhande ubogamiyeho. Imvugo itandukanye n’iy’ubuvanganzo hirindwa gukoresha imizimizo.

Kwirinda gukoresha amagambo abiri uvuga ikintu kimwe. Gutumbera gusa icyo ushaka kugeraho nta guca kure kugira ngo ugere ku cyo ushaka kugeraho. Kuvuga ku buryo bunonosoye kugira ngo wumvikanishe neza icyo ushaka gutangariza abasomyi ariko utarondogoye.

Kugaragaza inyandiko nsesengurabumenyi zindi wifashishije. Gukoresha amagambo yumvikana, interuro ngufi,... Ni ukwandika usa n’utanga isomo kuko intego ari ugutanga ubumenyi bushya.

Gukoresha indagihe ku bizwi cyangwa ibyo wemeza, impitagihe ugaragaza amakuru yari asanzweho cyangwa imyanzuro yari yarafashwe. Gukoresha ngenga ya gatatu.

Umutwe wa gatandatu

Iterambere

Umutwe wa 6: Iterambere

Umurunga w'iminsi

Burya gusaza ni ugusahurwa
Kuko iyo tujya ni habi
Nariye iminsi ndayiyongeza
Nsigara nyitera inyoni ziguruka
None iranze iranyigabije
Iranyigaranzuye yo gapfusha
Cyo rero kibondo cyange
Igira hino nkurage intwaro
Nitwaje iki gihe cyose
Ibihe bibi byose nkabyireza
Uyitwaje azira kuneshwa
Utayitunze azira kuramba
Iyo ntwaro izirika iminsi
Nta yindi shahu ni umurimo
Iyo isi imaze kukurambirwa
Kuko nta cyo uba ukiyimariye
Imikaka y'iminsi irarindwa. Aaaa! Aaaa!
Mbese ye wakwizera ute ubuzima bw'ejo
Udakoze ngo wiyuhe akuye
Ngo uyishake uyitege iminsi iiiiii iiiiii

Inyikirizo

Aho wenda, x2
Aho wenda kibondo cyange
Aho wenda ntuzibuka yuko umurunga w'iminsi ari umurimo
Aho wenda, x2
Aho wenda kibondo cyange
Aho wenda buto bwange
Aho wenda ntuzabyibuka
Ni yo mpamvu itumye
Mbikubwiye nkwihanangirije
Ntugahaburwe n'ibyo hanze aha
Ibi bizanwa n'abagenzi
Ngo bigutware umutima wawe
Bikwibagize umurimo
Burya ga ni uko utabizi
Guterwa umutwe n'umwanda
Ntibitindana n'ubwo byizerwa
Ubundi kandi bihira bake
Inyikirizo
Uramenye x3
Utazazira iyo mikaka
Rindwa abagifite ubukaka
Cyane abo mu kigero cyawe (x2)

Indirimbo ya Kagame Alexis

Indirimbo

Uhereye kuri iyi ndirimbo, erekana imiterere y'indirimbo n'ikishamvugo rikoreshwamo. Garagaza akamaro k'indirimbo mu gutambutsa ubutumwa.

1. Inshoza y'indirimbo

Indirimbo ni imwe mu ngeri z'ubuvanganzo irangwa n'injyana ndetse n'impuzarugwiro. Mu kuririmba indirimbo amajwi ashobora guherekezwa n'amashyi, umudiho, umucezo, ingoma ndetse n'ibyuma binyuranye byirangira. Injyana y'amajwi y'indirimbo iryohera amatwi, ikabyutsa imbamutima maze umubiri wose ukanezerwa kugera aho kunyeganyega ndetse n'ababishoboye bakabyina.

2. Uturango tw'indirimbo

- Yandikwa ku buryo bw'amabango nk'umuvugo.
- Ikoresha amagambo yabugenewe kandi y'indobanure.
- Hakenerwa ijwi ryiza
- Ikoresha impuzarugwiro.
- Hakoreshwa injyana
- Ikoresha intero n'inyikirizo
- Ikoresha ururirimbo.

3. Ikeshamvugo mu ndirimbo

Indirimbo kimwe n'ubundi busizi bukoresha ikeshamvugo ryihariye. Iri keshamvugo riba rishingiye ku kivugwa cyangwa ku buryo bwo kukivuga. Mu ndirimbo hakunze gukoreshwa ikeshamvugo rikurikira:

a) Injyana

Injyana ni nk'umutima w'indirimbo. Nta ndirimbo itagira injyana, iramutse nta njyana ifite byagorana kugira ngo iherekezwe n'amashyi cyangwa umudiho.

b) Isubirajwi

Isubirajwi ni isubiramo rya hafi ry'imvugwarimwe ifite indi iyibanziriza zisa cyangwa zijya gusa cyangwa ijwi na ryo rifite irindi riribanziriza bisa cyangwa bijya gusa, ku buryo bibyara ikintu cy'urujyano mu kuryohera amatwi cyangwa bikagira icyo byibutsa ku muntu ubyumva.

Muri buri gice k'indirimbo “Umurunga w'iminsi” harimo isubirajwi.

Urugero

Burya gusaza ni ugusahurwa

Cyo rero kibondo cyange

Ngo uyishake uyitege iminsi

c) Isubirajambo cyangwa itsinda ry'amagambo

Abenshi bakunda kwitiranya isubirajwi n'isubirajambo. Nyamara isubirajambo ni igihe isubirajwi rigaruka mu ijambo bihuriye ku gicumbi kimwe n'iryaribanjirije cyangwa se ijambo rikagaruka uko ryakabaye.

Umuririmbyi agenda asubiramo inyikirizo cyangwa se amagambo amwe n'amwe.

Urugero

Aho wenda! Aho wenda

Aho wenda kibondo cyange

Uramenye! Uramenye

Utazazira iyo mikaka

Rindwa abagifite ubukaka.

d) Imizimizo

Ni uburyo umuririmbyi akoresha mu kuboneza imvugo ye atitaye ku myubakire y'interuro. Mu mizimizo ikunze gukoreshwa twavuga igereranya, ihwanisha, iyitirira, ishushanya

Urugero

Ihwanisha: Umurimo = intwaro.

Ibibazo = imikaka.

Umuvugo

- Uyu mwandiko ni bwoko ki? Kubera iki?
- Uhereye kuri uyu muvugo, erekana imiterere y'umuvugo n'ikeshamvugo rikoreshwa mu muvugo

1. Uturango tw'umuvugo (igisigo)

a) Ikeshamvugo mu muvugo

Kugira ngo umuvugo uryohere amatwi (kuko umuvugo wagenewe kuvugwa) kandi n'ikivugwa kirusheho gutera amatsiko, hari ibintu umuhanzi agomba kwitaho harimo cyane cyane injyana, isubirajwi n'isubirajambo.

b) Injyana mu muvugo

Mu bitanga injyana mu muvugo harimo: imikarago, inkubito, ihuzamitwe, ...

c) Umukarago

Umukarago ni wo wakunze kuranga igihangano cyo mu busizi ukaba ugaragarira mu ikoresha ry'interuro ngufi, ariko ukanashingira cyane ku bipimo nk'ibikoresha mu muziki. Imikarago ihuzwa no gusangira injyana (umubare w'utubeshuro ungana ndetse n'inkubito yayo inihura cyangwa inimitse).

Kwiga injyana y'igihangano nyabusizi ni ukubara utubeshuro twa buri mukarago. Mu busizi nyarwanda hakunze kuboneka injyana z'utubeshuro 12, 10, 9, 8, 6.

Ubusizi bw'ubu

Muri iki gihe abantu bagenda batita cyane ku mahame yarangaga ubusizi bwo mu gihe cya kera birimo injyana ipimye indinganire, intondeke zifite umubare ungana w'imikarago, n'ibindi. Kubera izo mpamvu, hagenda haboneka imivugo igaragaramo ubwigenge ku bijyanye n'ayo mahame yatumaga ubusizi budapfa kwigerezwa n'ubonetse wese.

a) Inkubito

Itangwa n'uburyo umugemo uvugwamo, utebukwaho cyangwa utindwaho. Hari rero imigemo itinda n'imigemo itebuka. Umugemo utinda utanga inkubito inimitse, naho umugemo utebuka ugatanga inkubito inihura.

b) Ihuzamitwe ry'imikarago n'intondeke

Ihuzamitwe ni isubiramo ku mpera z'imikarago ibiri cyangwa myinshi ry'ijwi rimwe rihuye cyangwa amajwi menshi asa. Amahuzamitwe y'imikarago agira amazina atandukanye bitewe n'imiterere yayo ndetse n'inkubito yayo.

➤ *Duhereye ku miterere y'imitwe y'imikarago tubona:*

- **Ihuzamitwe ryorohereje:** rishingiye ku ijwi rimwe rigaruka
- **Ihuzamitwe rigereraniye:** rifite amajwi abiri ahuye (ingombajwi+inyajwi cyangwa inyajwi + ingombajwi)
- **Ihuzamitwe ritubutse:** irishingiye ku majwi atatu cyangwa arenga asa.

➤ *Dukurikije inkubito yo mu mpera z'imikarago tubona:*

- **Ihuzamitwe rinihura:** igihe umugemo ubanziriza uwa nyuma uba utebukwaho (udatinda).

Ingero

Umwanzi akubonye yahise aganya.

Intege ziba inteja abura aho agana.

(Rugamba Cyprien).

- **Ihuzamitwe rinimbitse:** igihe umugemo ubanziriza uwa nyuma utinda.

Ingero

Singizwa keeza

Cyangana n'icyaaha

Turakwambaza cyaane

Singizwa mpiinga

Yizihwe n'impuundu

Wanga abanyampuha.

(Rugamba Cyprien).

Inyurana ry'injyana n'ikibonezamvugo.

Ubusanzwe, ukwitsa ijwi mu njyana, guhura n'iyitsa ryo mu kibonezamvugo (impera y'interuro cyangwa y'inyangango). Nyamara hari igihe habayeho kunyurana kw'ibyo byombi nka:

- Iyo interuro y'umukarago umwe ikomereza ku mukarago ukurikiyeho.
- Iyo hari ijambo rimwe ryarenze ku mukarago ubanza.
- Iyo umukarago utangiriye ku mpera y'uwawubanjirije.
- Ibyo byose hari ingaruka bigira ku mvugo no ku kivugwa.

Gusesengura umuvugo

Inzego zo gusesengura umuvugo

Hari inzego enye zo gusesengura igihangano nyabugeni ari zo:

- **Urwego rw'ibisobanuro bibumbatiwe n'amagambo yakoreshejwe:** Ijambo rishobora gukoreshwa rifite igisobanuro cyaryo gisanzwe, cyangwa rigakoreshwa mu mvugo ishushanya (inyito shusho),
- **Urwego rw'ikibonezamvugo:** Imyubakire y'interuro.
- **Urwego rw'injyana:** Indeshyo y'imikarago, igipimo,...
- **Urwego rw'amajwi:** Uburyohe butangwa n'amajwi.

Kimwe no ku nkuru, hari ibibazo umuntu agomba kwibaza kugira ngo bimufashe gusesengura umuvugo.

Uretse rero ibibazo twabonye ku nkuru, umuvugo ugira ibibazo

by'umwihariko kubera ibi bikurikira:

Igihangano nyabugeni gikoresha amagambo atoranyije neza n'imvugo iziguye.

Haba higanjemo imvugo shusho n'ikeshamvugo.

Umuvugo ugira amahame yihariye awugenga ashingira ku isubirajwi, injyana, imikarago, n'imiterere.

Dore rero ibibazo wakwibaza mu gusesengura igihangano nyabugeni

Ibibazo rusange (ku myandiko yose.)

Ni iki mbona imbere yange?

Kuri iyi ngingo, usesengura yibaza kuri ibi bintu bikurikira:

- Ubwoko bw'umwandiko, umutwe wawo, uw'igitabo wakuwemo, izina ry'umwanditsi, igihe igitabo

cyasohokeye, ... Ibi ni ingenzi mu kumenya ibihe n'ahantu umuvugo wahangiwe, bityo bigakingurira usesengura amarembo yo kuwumva.

-Imiterere y'umwandiko ku rupapuro. Bituma umenya ubwoko bwawo.
Ibyo ubona ukiwukubita amaso: Bishobora gutuma ubona ibiwuranga.

Ni nde uvuga?

Hari amagambo bwite y'umubazi w'inkuru ari mu muvugo?

Ni nde uvugwa/ni iki kivugwa?

Abanyarubuga bavugwa ni ba nde?

Ibivugwa byabaye ryari?

Icyo gihe kigaragazwa n'ibihe inshinga zitondaguwemo.

Ni hehe byabereye?

Ni ahantu hariho hashobora kubonwa n'amaso? Ni ahantu umuhanzi yihimbiye hatabayeho?

Umuhanzi yifashisha ate amagambo mu gutaka icyo avugaho?

Ni ayahe magambo akoreshwa, imvugo shusho zirimo, ibisobanuro bitandukanye ijamba rishobora kugira,...
Ni iyihe mvugo yahisemo: Igaragaza ishavu cyangwa agahinda, ibyishimo, ininura, iyo guhangana,... Ni uruhe rwego rw'imvugo: Iboneye, iya giseseka, nyandagazi,... Ni irihe keshamvugo: Igereranya, isubirajwi,...

Ibibazo byihariye ku muvugo.

Umwandiko nyabugenye wumvikana ku buryo bwawo wihariye. Bityo rero mu kuwusesengura hari ibibazo byihariye ugomba kuwibazaho:

- Ni iki kiwuha kuryohera amatwi/amaso rimwe na rimwe? Aha tureba isubirajwi, isubirajamba, ... tukongera kureba uburyo wanditsemo.
- Ni iyihe nnyana yakoreshejwe; igipimo? Ni izihe ngaruka guharanira kuboneza injyana byagize ku kibonezamvugo? Imikarago irareshya? Ijya kureshya? Cyangwa ni ubusizi bwanditse mu nteruro ndende?
- Inkubito inihura n'inimbitse zibangikanye gute?

Insanganyamatsiko

Mu muvugo kimwe no mu yindi myandiko havugwamo ibitekerezo cyangwa insanganyamatsiko zinyuranye.

Hagati y'intangiriro n'impera y'umuvugo hari ibitekerezo bitandukanye, bigenda byuzuzanya cyangwa bitondetse mu buryo ubu n'ubu.

Urugero

Nko mu gisingizo kirata ubwiza bw'umukobwa, umuhanzi ashobora kuva ku musatsi akagera ku mano, cyangwa agahera hasi agana hejuru.

Umuvugo wagenda usubira mu gitekerezo kimwe gusa ntabwo washimisha. Uburyohe bw'umuvugo rero bushingira no ku guhindagurika kw'ijwi, inzego zitandukanye z'imvugo, ... ibyo na byo bigomba kugaragazwa mu isesengura.

Ikomorazina mvanshinga

1. Inshoza y'ikomorazina mvanshinga

Ikomorazina mvanshinga ni ihimba ry'amazina mashya ufatiye ku mizi y'inshinga zisanzwe mu rurimi uru n'uru. Mu Kinyarwanda rikoresha imisozo itanu ari yo: -a, -e,-i, -o, -u na -yi.

Umusozo: ni akaremajambo gasoza inshinga cyangwa izina rikomoka ku nshinga.

2. Inzira z'ikomorazina mvanshingo

1. Ikomorazina mvanshinga rishingiye ku musozo –a

Rirakoreshwa cyane mu Kinyarwanda kandi rijyana n'ingereka zinyuranye.

Ingero

Inshinga	Izina rikomoka kuri iyo nshinga
kurima	umurima
gukama	ikama
gupfa	amapfa
guta	intabwa
kuganya	amaganya
gukenga	amakenga
gukora	ibikorwa
kwizera	umwizera
gusaza	umusaza
guta	amateshwa

2. Ikomorazina mvanshinga rishingiye ku musozo –e

Ribyara amazina y'ingeri nyinshi kandi rishobora no gufata ingereka.

Ingero

Inshinga	Izina rikomoka kuri iyo nshinga
kwiga	imyigire
kwigisha	imyigishirize
kurera	uburere
kubumba	umubumbe
kwiyoroshya	ubwiyoroshye
gutera	amatere
gutema	igiteme
gukwa	ubukwe
gucya	ubuke
gushya	ubushye
gukora	imikorere
kuramba	uburambe
kuraga	umurage

3. Ikomorazina mvanshinga rishingiye ku musozo –O.

Uyu musozo na wo urakoreshwa cyane mu Kinyarwanda mu ikomorazina mvanshinga. Ushobora no kujyana n'ingereka zitandukanye.

Ingero

Inshinga	Izina rikomoka kuri iyo nshinga
----------	---------------------------------

gutwara	intwara/umutwara
kongeza	inyongezo
gutera	umutero/igitero
kurya	indyo
kurunda	ikirundo
gutega	umutego
kwibuka	urwibutso
gutinda	urutindo
kugera	ikigero
kwanga	urwango
kuzirika	ikiziriko
gukina	igikinisho
gufunga	irufunguzo

4. Ikomorazina mvanshinga rishingiye ku musozo -I

Ukoreshwa inyuma y'ibicumbi by'inshinga bigizwe n'umugemo umwe cyangwa birengeje umugemo umwe kuko umusozo -yi udakorana na bene iyo mizi.

Inshinga	Izina rikomoka kuri iyo nshinga
Gutona	Umutoni
Guhiga	Umuhigi
Kunnya	Umunnyi
Gutwara	Ubutwari

5. Ikomorazina mvanshinga rishingiye ku musozo -U

Inshinga	Izina rikomoka kuri iyo nshinga
gupfa	umupfu
kunguka	inyungu
guhema	umuhemu
kuramuka	indamu
kuragura	indagu
kugemura	ingemu

6. Ikomorazina mvanshinga rishingiye ku musozo --yi

Rirakoreshwa cyane mu Kinyarwanda.

Ingero

Inshinga	Izina rikomoka kuri iyo nshinga
gusahura	ubusahuzi
gutera	imitezi
kwanga	umwanzi
gutunga	ubutunzi
gukora	umukozi
gutega	umutezi
kurera	umurezi
kugenda	umugenzi
kwica	umwicanyi
kurwara	umurwayi
kubaza	umubaji
kuvura	umuvuzi
guteka	umutetsi

guhaha kudoda	umuhashyi umudozi
--------------------------	----------------------

Umutwe wa 7: Imiturire

7.2. Ibihe bikuru by'inshinga

Mu Kinyarwanda inshinga yose itondaguye igomba kugira igihe itondaguyemo hakurikijwe urwego rw'ibivugwa n'irebero (ko ibivugwa byarangiye cyangwa bitararangira) ryabyo. Habaho rero ibihe bikuru bitatu mu itondaguranshinga. Ibyo bihe ni igihe cyahise kivuga ibyamaze kuba kikitwa impitagihe. Hakaba ikivuga ibiriho ubu kikitwa indagihe. Hakabaho n'ikivuga ibizaba cyangwa ibizaza kikitwa inzagihe.

1. Indagihe

Indagihe ivuga ibiba muri aka kanya, ibiba ubusanzwe n'ibyabaye kera bivugwa mu nkuru bityo ikagabanywamo indagihe y'aka kanya, indagihe y'ubusanzwe, indagihe y'imbarankuru n'iy'igikomezo.

a) Indagihe y'ubu/ubungubu, mu kanya kaza

Iyi ndagihe yumvikanisha ikirimo gukorwa ubu aho uvugiye. Indangagihe yayo ni -ra- naho umusozo ni -a. **Ingero** Ndahinga mu rutoki.
Ubu ndandika ibaruwa.

b) Indagihe y'ubusanzwe

Indagihe y'ubusanzwe yumvikanisha igikorwa gisanzwe gikorwa. Ntawamenya intangiriro n'iherezo ryacyo. Mu isesengura ryayo irangwa n'umusozo -a. Indangagihe yayo ni -ø-

Ingero

Izuba rirasa mu gitondo.
Nkunda gusoma ibitabo.
Nigisha ubumenyi bw'isi.

c) Indagihe y'imbarankuru

Indagihe y'imbarankuru umuntu ayikoresha avuga ibyabaye kera nk'aho ari iby'ubu. Igira intego iteye nk'iy'indagihe y'ubusanzwe bigatandukanira ku nshoza.

Indangagihe yayo ni -a-ra**I** Umwarimu arahaguruka abwira abanyeshuri be ati:
“Mwigane umwete bizabafasha”.

d) Indagihe y'igikomezo

Indagihe y'igikomezo yumvisha igikorwa kirimo gukorwa ubu ngubu ntawamenya igihe cyatangiriye nta n'uwamenya igihe kiri burangirire, Indangagihe yayo ni -ra-ki-âa na -ra-ki

Ingero

Ndacyasoma igitabo.
Aho aracyakoze wa murimo?
Turacyamutegereje.
Ibikorwa remezo biracyatera imbere.**ro**

2. Impitagihe

Impitagihe ivuga ibintu byahise kare n'ibyahise kera ikigabanyamo impitakare n'impitakera.

a) Impitakare

Impitakare yumvisha igikorwa cyarangiyeye mu gihe cyahise ariko kitarengeje uyu muni mu gitondo.

Indangagihe yayo ni -a-.

Ingero

Nateraga urubingo.

Naharuraga umuhanda.

Twateraga umupira.

b) Impitakera

Impitakera yumvisha igikorwa cyarangiyeye mu gihe cyahise uhereye ejo hashize ugana hirya yaho.

Indangagihe yayo ni -â- na -â-ra

Ingero

Nabyinaga mu itorero Indangamuco

Natozaga ikipe y'igihugu

Nasomye Bibiliya nkiri muto.

Narabyinnye.

3. Inzagihe

Inzagihe ivuga ibiza kuba cyangwa ibizaba nyuma y'igihe cyo kuvuga. Yigabanyamo inzahato n'inzakera.

a) Inzahato

Inzahato ivuga ibiri bube nyuma yo kuvuga ariko ntibifatire undi muni. Indangagihe yayo ni –ra-.

Ingero

Ku gicamunsi uratera umupira.

Mu kanya uramperekeza ku isoko.

Araza kukubwira igikenewe.

b) Inzakera

Inzakera ivuga ibizaba ejo hazaza cyangwa mu bihe bizakurikiraho. Indangagihe yayo ni –zaa-.


Ingero

Tuzaririmba indirimbo z'agakiza.

Muzadusura ryari?

Tuzagera ku iterambere mu bikorwaremezo.

Dore uko ibihe by'inshinga biteye ku gishushanyo:



7.4. Uburyo bw'inshinga itondaguye

1. Inshoza y'itondaguranshinga

Inshinga mu nteruro ni ijamba ribumbatira ingingo yumvikanisha igikorwa cyangwa imimerere ya ruhamwa ndetse n'isano iri hagati ya ruhamwa na ruhamya.

Itondaguranshinga rero ni uburyo bwo kuvuga ibyo ubona cyangwa utekereza, ubyemeza cyangwa ubihakana, wumvikanisha ko ibyo uvuga nta cyo ubishidikanyaho cyangwa ushidikanya, wumvikanisha igihe byabereye, ko byarangiye cyangwa bigikomeza n'ibindi.

2. Uburyo bw' inshinga

Inshinga itondaguye ishobora kujya mu buryo bunyuranye. Ubwo buryo ni ikirango, integeko, ikigombero, inyifurizo insano, inziganyo n'imbundo.

Uburyo ni imiterere y'ubwumvane hagati y'uvuga n'ubwirwa kimwe n'uko yitwara mu magambo ye. Iyo miterere yumvikanisha inshoza yo kuranga, gutegeka, kwifuriza, kugomba no kuziganya.

a) Insano

Insano ni uburyo inshinga iba iteye idafite indanganshinga ariko utundi turemajambo twayo tukaba utw'inshinga. Nta karemajambo kihariye kerekana insano.

Ingero

Uhemuka aba atagira isoni.
Asuzugura nk'imbwa *iryana*

b) Inyifurizo

Inyifurizo ivuga icyo umuntu yifuriza nyakubwirwa cyangwa nyakuvugwa yifuriza ibyiza cyangwa ibibi nko gutukana. Inshinga iri mu buryo bw'inyifurizo nayo igira uturemajambo, ariko akaremajambo kayiranga ni -ka-.

Ingero

Kagire Imana n'amafaranga!
Urakabyara uhinguye!
Komera wo karama we!
Uragahorana amata k'uruhimbi!
Urakaruha uwa Kavuna!

c) Ikirango

Uburyo bw'ikirango ni uburyo bwumvikanisha ihame. Ni uburyo budashidikanya cyangwa ngo bwumvikanishe ikifuzo. Ubu buryo bwitaruye cyane uburyo bw'imbundo n'uburyo bw'integeko kuko bwo bugaragaza ibihe by'igikorwa kibumbatiwe n'igicumbi k'inshinga.

Uvuga ashobora kurangura ibikorwa mu gihe arimo kuvugiramo, kubyerekeza mu byatambutse ataravuga cyangwa akabishyira mu kizaza. Bityo inshinga iri mu buryo bw'ikirango ikagira indangagihe zinyuranye zijyana n'ibyo byerekezo by'igihe utasanga mu nsano cyangwa mu ntegeko. Indango yayo yemeza nta karemajambo kayiranga. Naho indango yayo ihakana irangwa n'akaremajambo nta- -ta- cyangwa -iUburyo bw'ikirango burimo amoko atatu ariyo: Ikirango gisanzwe, ikirango cyunga n'ikirango gisobanura.

1. Ikirango gisanzwe

Ingero

Aramurebye arahumbya.
Igikakarubamba **kivura** indwara nyinshi.
Yahageze **atinze**.

Turataha cyangwa turarara?
Tuzagusura nubishaka.

2. **Ikirango cyunga**

Ni imigendekere iranga ivuga ahanini uko igikorwa cyangwa imiterere biherekeje ibindi ikabigira ivuga igihe cyangwa uburyo. Inyangingo kiremye ntishobora kuba yihagije ahubwo iteka iba igaragira.

Ingero

Mvuye kwiga naniwe
Iyi mvura yaguye twayishakaga
Yazaga asanga twarabikoze byose

3. **Ikirango gisobanura**

Ni imigendekere y'ikirango isobanuye izina cyangwa se irindi jambo rishobora kurisimbura cyangwa se inyangingo ngaragira. Naho impakanyu yayo ni –ta**Inge**

Inzoga tunyoye iraryoshye (Kirasobanura izina)

Izô nakuguriye zizagukwira (kirasobanura ikinyazina)

Nkeneye ko muza hano (kirasobanura inyangingo)**ro**

d) **Integeko**

Integeko ni uburyo bakoreshamo inshinga ivuga itegeko ryaba rivuzwe kuri nyakuvuga cyangwa nyakuvugwa. Irangwa n'umusozo –a na –e.

Ingero

Ndavuze ngo : “Taha”.

Cana iryo tara.

Muzamuzane hano.

e) **Inziganyo**

Inshinga iri mu buryo bw'inziganyo ivuga uko igikorwa cyangwa imimerere bishingira ku kindi kintu ngo bishoboke.

Ingero:

Nibahagera umenyeshe.

Nzakwibuka nibitungana.

Nibatampemba sinzabikora.

f) **Ikigombero**

Ikigombero kirangwa mu myumvire n'akarango kumvikanisha inkeko, ingwaturizo n'igenekerezo.

Ingero:

Tubonye akazi twakora.

Dufite uburyo twakubaka.

Dukoze cyane twakira.

g) **Imbundo**

Ni uburyo inshinga iba irimo igaragaza igikorwa kitaziwe ugikora n'igihe gikorwa. Imbundo yisanisha n'izina ryo mu nteko ya 15 maze ikagena isanisha mu nteruro.

Ingero:

Kubaha abanyu bose ni ngombwa.

Kwirinda biruta kwivuza.

Kuririmba kwawe kuradushimisha.

Umutwe wa munani

Umutwe wa 8 : Ikoranabuhanga

Amagambo adahinduka

1. Imigereka

a) Inshoza y'umugereka

Umugereka ni ijambo cyangwa urujyano rw'amagambo rudasesengurwa risobanura izina, ntera, inshinga cyangwa undi mugereka. Rivuga uburyo, ahantu, igihe cyangwa inshuro. Umugereka ushobora kuba buhangwa cyangwa ukaba urwunge rw'amagambo.

b) Amoko y'imigereka

Umugereka uvuga uburyo, umugereka uvuga igihe, umugereka uvuga ahantu, umugereka uvuga inshuro, umugereka wemeza ndetse n'umugereka uhakana.

Umugereka uvuga uburyo

Ingero

- Vuga **cyane**.
- Musome **bucece**.
- Twabikoze **neza**.
- Gira **vuba**.

Umugereka uvuga igihe

Ingero

- Uze **none**.
- Uzataha **ryari**?
- Azaza **ejo**.

Umugereka uvuga ahantu

Ingero

- Shyira **ejuru**.
- Erekeza **epfo**.
- Murabica **iruhande**!
- Ageze **kure** kubi.
- Umugume **hambavu**.

Umugereka uvuga inshuro

Ingero

- Dusibye **gatatu**

- Wangiriye neza **kenshi**
- Ni **gake** ngera i Kigali.

N.B: Hari imigereka igaragara nk'aho yagoragozwa.

Ingero

- **Mbere**→hambere.
- **Nyuma**→hanyuma, inyuma.
- **Ruguru**→haruguru.
- **Hasi**→ munsu.
- **Epfo**→ hepfo.
- **Irya**→hirya, hakurya.

Umugereka wemeza n'umugereka uhakana

Ingero

- Yego koko ibyo uvuze ndabyemeye. Ni ngombwa kwitabira ikoranabuhanga. (Umugereka wemeza)
- Oya! Ntibikwiye ko abana banywa ibiyobyabwenge. Ntibyujje ubuziranenge. (Umugereka uhakana)

Ikitonderwa

Imigereka imwe y'ahantu igenda ihinduka ku buryo hari uwakeka ko yagoragozwa. Nyamara ntibishoboka, ahubwo twavugaga ko ari imigereka y'urwunge rw'amagambo iba yakomotse ku migereka buhangwa.

2. Indangahantu

a) Inshoza y'indangahantu

Indangahantu ni ijambo ribanziriza irindi, rivuga aho umuntu cyangwa ikintu biherereye cyangwa ahabera ikintu iki n'iki. Indangahantu irema urujyano rw'amagambo abera inshinga ruhamwa cyangwa icyuzuzo nziguro.

b) Amoko y'indangahantu

Indangahantu ni eshatu mu Kinyarwanda

- “Ku” mu nteko ya 17
- “Mu” mu nteko ya 18
- “I” mu nteko ya 19

Ikitonderwa

Iyo indangahantu “ku” na “mu” zikurikiwe n'izina ridafite indomo cyangwa ibinyazina bimwe na bimwe, zigira impindurantego “kuri” na “muri”.

Ingero

- Atuye muri Zambiya.
- Yubatse kuri Huye.
- Ndi mukuru kuri we.

Nyamara tuvuga

- Abana ntibagakinire mu muhanda.
- Ngiye ku iriba.
- Akora i Rusizi.

4. Ibyungo

Ikoranabuhanga **rero** ryatuzaniye byinshi, **kuko** mu binyejana byahise, nta wari gutekereza **ko** umuntu azaguruka mu kirere, **ndetse** akajya **no** ku kwezi, cyangwa ko azajya ashobora kuvugana **n’**uri ikantarange akoresheje akantu gatoya ashobora kugendana mu mufuka, ari ko terefone igendanwa.

a) Inshoza y’icyungo

Icyungo ni ijambo cyangwa urujyano rw’amagambo bidashobora gusesengurwa bihuza amagambo abiricyangwa inyangingo ebyiri. Ibyungo bifite imimaro myinshi mu nteruro no mu gutanga ibitekerezo kuko ari byo bigaragaza inyurabwenge mu ruhererekane rw’ibitekerezo cyangwa rw’interuro.

Duhereye ku miterere yabyo ibyungo birimo amoko 4 akurikira:

a) **Ibyungo buhangwa**: ni ukuvuga by’umwimerere bidakomoka ku bundi bwoko bw’amagambo.

Urugero: na, nka, cyangwa, erega, ngo, maze, ariko, nyamara, aho, ko, kandi...

b) **Ibyungo by’inege** kuko bisa n’aho bikomoka ku nshinga. Urugero: uboshye, ndetse, ubanza...

c) **Ibyungo by’inyumane** kubera ko bisa n’aho bigizwe n’amagambo abiri kandi bikaba byunga igitekerezo ku kindi. Urugero: yuko, kuko, koko, nako... na+ko; ko+ ko.

d) **Ibyungo bigizwe n’Urujyano rw’amagambo**: n’iyo, kugira ngo, kubera ko, icyo bikora,...

b) Imimaro y’ibyungo

➤ Icyungo “**na**” gifite umumaro wo kunga amagambo hagati yayo. Iki cyungo kigira impindurantego “**no**” ikoreshwa imbere y’imbundo.

Ingero

Rutamu **na** Butera

Inka **n’**ihene

➤ Icyungo **nka**, **boshye** na **kimwe** bifite umumaro wo kugereranya. Icyungo **nka** kigira impindurantego **nko** ikoreshwa imbere y’imbundo, y’indangahantu n’imbere y’umugereka w’ahantu.

Ingero

Uyu mwana agenda nka se. Agira urusaku rwinshi boshye inkuba.
Nabikoze **kimwe** nawe.

➤ Ibi byungo **ko, ngo** bifite umumaro wo kuzuza.

Ingero

Avuze **ko** mugenda.

Ndasaba **ngo** muze.

Ngo baje baramubura.

➤ Ibi byungo **cyangwa, keretse** bifite umumaro wo guhitamo.

Ingero

Ngwino **cyangwa** ugende.

Singenda **keretse** ugarutse.

➤ Ibyungo **uretse ko, nkanswe, nyamara, aho, ariko** bifite umumaro wo kubangikanya cyangwa kubusanya

Ingero

-Turakora **uretse ko** tutabona umusaruro twifuza.

Aterura umufuka wa sima **nkanswe** ijerekani y'amazi.

Ntiyari yiteguye ibizamini **nyamara** yarabitsinze.

Bamubajije aho gusubiza araseka.

➤ Ibyungo **kandi, ndetse** bifite umumaro wo kongeraho

Ingero

Ni umuhanga **kandi** aritonda.

Yaramukubise **ndetse** aramukomeretsa

➤ Icyungo **iyoye** gifite umumaro wo kuziganya cyangwa wo kugaragaza ibitaragezweho mu gihe cyahise kikagaragaza ukwicuza.

Ingero

Iyo uzinduka tuba tugezeye.

Iyo mbimenya simba narishinze gutera umupira ngo gusoma ibitabo mbiharire umwanya muto.

➤ Ibyungo **kubera ko, kuko, ko** bifite umumaro wo kuvuga impamvu cyangwa inkurikizi.

Ingero

Yatsinzwe **kubera ko** atize.

Bamuhembye **kuko** yakoze neza.

Ko wakerewe none tubigire dute?

➤ Icyungo **nako** gifite umumaro wo kuvuga kwigarura.

Urugero

Nari nje **nako** nisubiyeho.

- Ibyungo **ubanza, ariko, nyamara, icyakora** bishobora kunga inyangingo ebyiri ariko imwe ikaba itavuzwe. icyo gihe inyangingo itavuzwe iba ishingiye ku gitekerezo uvuga afite cyangwa ku gikorwa abavugana baziranyeho. Bene ibi byungo bamwe babyita mbanza.

Ingero

- Ubanza ngiye kugerayo.
- Ariko nawe uratinda ugakabya!
- Nyamara ni muzima.
- Icyakora tuzajyanayo.

Ikitonderwa:

Mu byungo hari ibiri ngombwa, kuko iyo bivuye mu nteruro itakaza ubutumwa bwayo n'ibindi bita ntagombwa kuko iyo bivuye mu nteruro ikomeza kugira ingingo yayo.

Ibyungo ngombwa

Ingero

Agenda nk'umwambi. - Agenda umwambi.

Yifuje ko muba muhari. - Yifuje muba muhari

N'ingwe narayifashe nkanswe impyisi. - N'ingwe narayifashe impyisi.

Uraryamye boshye urwaye. - Uraryamye urwaye.

Ibyungo ntagombwa.

Ingero

Arahinga ariko ntiyeze. - Arahinga ntiyeze.

Turahaguruka maze turagenda. - Turahaguruka turagenda.

Babibonye nuko barabigura. - Babibonye barabigura.

5. Utumamo

1. Inshoza y’akamamo

Akamamo ni ijamba ridasesengurika riba rigizwe n’umugemo umwe. Akamamo gaherekeza irindi jambo kakariha inyito yo gutangara, yo kwakuza cyangwa itsindagira. Akamamo gashobora no guherekeza ikegeranshinga n’irangamutima.

2. Akamamo k’inshinga.

Ingero

Gutangara:

- Arabivuze **ra!**
- Have genda **ma!**
- Sinamukira **da!**
- Barikoze **nya!**
- Aragowe **we!**

Kwakuza: Bivuge **ye!**

Gutsindagira:

- Bivuge **ga!**
- Garuka **ye!**
- Bivuge **se!**
- Bihakane **se!**

Akamamo k’inshinga kayiherekeza kayiha inyito yo gutangara, kwakuza cyangwa inyito yo gutsindagira.

Ikitonderwa

Utumamo “da!” na “ma!” ni impindurantego. Akamamo “da”! gakunda kubwirwa umuntu w’igitsina gabo, akamamo “ma”! ko kakabwirwa umuntu w’igitsina gore.

Udusigaye two tubwirwa abantu hatitawe ku gitsina gore cyangwa gabo.

6. Ibyegeranshinga

1. Inshoza y'ibyegeranshinga

Ibyegeranshinga ni amagambo afite imiterere n'umumaro nk'uw'inshinga itondaguye mu ntegeko, ariko akaba adashobora gutondagurwa muri ngenga zose no mu bihe bitandukanye kimwe n'inshinga zindi. Bene ayo magambo akoreshwa cyane mu mvugo cyanecyane mu biganiro. Ibyegeranshinga bikunze gukoreshwa ni: have, dore, hoga, henga, reka, sigaho, erega.

Amagambo: Dore, sigaho, hoga, mbisa, sigaho, ateye nk'inshinga kandi afite umumaro nk'uw'inshinga zitondaguye mu ntegeko ariko si inshinga kuko adashobora gutondagurwa muri ngenga zitandukanye.

2. Ingero z'ibyegeranshinga

- **Have** se!
- **Dore** ra!
- **Hoga** tugende!
- **Henga** nigendere!
- **Reka** nkwere ke uko babigenza!
- **Sigaho** kwica umuco nyarwanda!
- **Erega** ni ko nkora!

7. Amarangamutima

Inshoza y'amarangamutima

Amarangamutima ni amagambo adasesengurika, akora nk'interuro, akaba agaragaza uko umuntu amerewe mu mutima, yaba yishimye cyangwa ababaye, yaba ashima cyangwa agaya. Amarangamutima yandikwa akurikiwe n'agatangaro.

Amarangamutima agira inshoza zitandukanye. Zimwe muri izo nshoza ni izi:

Kwemeza:

urugero: Nhuu! Nabikwemereye.

Gutangara:

ingero:

Ahaa! Arongeye arabarushije pe!

Yoo! Nta soni uko ungana utyo ugakora utyo!

Kugaya:

urugero:

Apu! Hoshi uri imbwa gusa! Asyi!

Wa kigoryi we.

Gucecekesha:

urugero: Shuu! Muceceke araje. Suuu!

Mwisakuza.

Kwiruhutsa:

urugero: Ashyii! Reka nduhure akagongo.

Ahuu! Navunitse umugongo wee!

Kubabara:

urugero: Orororororo! Arankandagiye! Ayiii!

Aranyishe!

Kwikanga:

Ayi we! Dore intare wo gacwa we!

Ehee! Aranyica noneho we

Yuu! Aranyishe aranyishe we!

Ikitonderwa

Andi moko y'amagambo mu nteruro ashobora kuba amarangamutima bitewe n'uko yakoreshejwe cyangwa aho yakoreshejwe.

Mu myandikire yemewe y'Ikinyarwanda mu kwandika amarangamutima hashobora gukoreshwa inyajwi zikurikiranye. Zitarenze eshatu.

Ingero

Kamari wee! Baranyishe ntabara.

Igitegoo! Cyagezemo, bibaye bibiri.

Yoo! Ehee!,..

Akamamo gashobora kujyana n'irangamutima, ijambo rimwe ari irangamutima, irindi ari akamamo, ariko iyo afatiwe hamwe yombi akaba irangamutima.

Ingero:

Ayi we! Dore umujura!

Muri iyi nteruro:

ayi→irangamutima

we!→akamamo

ayi we! →irangamutima

Akamamo k'irangamutima**Ingero**

Ayi nya!

Ayi we!

8.4. Inkuru y'ikinyamakuru

1. Uturango tw'inkuru y'ikinyamakuru

Ibintu by'ingenzi biranga inkuru y'ikinyamakuru:

- Umutwe wayo: Ni mugufi, uteye amatsiko kuko utuma usoma agira amatsiko y'icyo umwanditsi agiye kuvugaho.
- Inkuru yanditse mu nkingi eshatu zigizwe n'interuro ngufi.
- Harimo ibisubizo ku bibazo abantu bakunze kwibaza: ni iki cyakozwe? Cyakozwe na nde? Hehe? Gute?
- Itariki inkuru yanditsweho n'uwayanditse.
- Izina ry'ikinyamakuru.

2. Gutegura inyandiko y'ikinyamakuru

Inyandiko y'ikinyamakuru igira amahame ya ngombwa igomba kubahiriza.

- Umwanditsi agomba kwandika mu mwanya wateganyirijwe urubuga rujyanye n'ibyo yandikaho ntawurenze, bityo akaba agomba kwita ku burebure bw'inyandiko ye, kandi akayandika yubahiriza amategeko amugenga.
- Umwanditsi agomba gutara amakuru mu buryo asubiza ibibazo bijyanye n'icyo abantu bakeneye kumenya: Ni iki cyabaye? Ni nde wagikoze? Cyabereye hehe? Ryari? Gute? Kubera iki?, Nyuma y'ibi haba hasigaye intera esheshatu ari zo:

a) Gutoranya ibyo ari bwandike

Ni ugutandukanya ibiri ngombwa byo kuvugaho, ibitari ngombwa cyane, cyangwa ibidakenewe na gato. Kureba noneho mu bitari ngombwa cyane ibyashishikaza abantu, ibyabafasha gusobanukirwa cyangwa ibisekeje, ariko ibyo abantu badakeneye akabikuramo.

b) Kuringaniza uburebure bw'inyandiko

Ni ngombwa kumenya uburebure bw'inyandiko ugomba gutegura. Iki ni ikintu k'ingenzi cyane kuko ikinyamakuru kiba gifite imyanya yagenewe buri bwoko bw'inkuru zigomba gusohorwa. Akenshi bikorwa hagenwa umubare w'amagambo ntarengwa, byaba ngombwa ntarenzeho 10%.

c) Kugena uburyo ubaramo inkuru

Abanyamakuru n'iyi bandika imyandiko nsesengurabumenyi bakunze kuyandika mu buryo bwo kubara inkuru. Hari ibibazo bitatu agomba kwibaza kugira ngo yubake imbata abyandikamo:

- Mpere ku kinini njya ku gito cyangwa mpere ku gito njya ku kinini?
- Mpite ntangaza amakuru y'ingenzi hanyuma nyasesengure nyuma, cyangwa ngende nyatatura buhorobuhoro?
- Nubahirize uko ibyabaye byakurikiranye mu gihe cyangwa mbikurikiranye mu buryo nihitiyemo buberanye n'ibyo nshaka ko abantu bumva?

d) Gukoresha inganzo y'itangazamakuru

Inganzo y'itangazamakuru irangwa n'ibi bikurikira:

- Interuro ngufi (akenshi bakunze gufatira ku mpuzandengo y'amagambo 12 kuri buri murongo, ukirinda kuzuzamo imibare n'amahinamagambo.
- Amagambo yumvikana neza atumvikana neza agasobanurwa.
- Kwibanda ku bintu bifatika; byakwemerwa nk'ibishoboka.
- Ikoreshwa ry'amafoto cyangwa amashusho.
- Kuvuga ibintu ku buryo butaziguye, ugakoresha utwuguruzo n'utwugarizo, ugashyira ibintu mu ndagihe.

e) Gutera amatsiko

Interuro y'igika cya mbere igomba gushimisha umusomyi ikamukururira gusoma ibikurikiyeho.

Itandukanye n'icyo bita interamatsiko zishingira ku gutangira inkuru y'ingenzi ku mpapuro zibanza ariko igakomereza hagati mu kinyamakuru.

f) Guhitamo umutwe uboneye w'inkuru

Umutwe w'inkuru ni ingenzi cyane. Ugomba kuba uteye amatsiko, utanga amakuru (Nde? Ryari? Hehe? Ni iki cyabaye? Gute?) cyangwa ukaba ushitura. Dore imwe mu miterere y'imitwe y'inkuru ushobora kwandika:

- *Interuro itangara*: Hehe n'uburezi budafite ireme!
- *Interuro ibaza*: Ni irihe banga ryo gutsinda mu mashuri?
- *Ikibazo n'igisubizo*: Waba wifuza *gutsinda ku ishuri? Dore ibanga.*
- *Interuro yemeza n'igisobanuro*: *Gutsinda Ikinyarwanda: Inyobora yuzuye y'abanyeshuri.*
- *Gukuruza abantu imibare*: Inama icumi zagufasha gutsinda amasomo yawe.
- *Ikeshamvugo (isubirajwi, ihuzamitwe, ...)*: Kwiga ni ukwigana.
- *Icurukiranya ry'amagambo y'ingenzi*: *Igira gutsinda, tsindira kwiga.*
- *Imishyamiranyo*: Tsinda neza utavunitse cyane!
- *Imvugo shusho*: Itwaze mwarimu mu mufuka wawe (umutwe w'agatabo).

Umutwe w'inyandiko y'Ikinyamakuru ugomba kuba wumvikanamo umwihariko wayo kandi ukaba ari mugufi. Ni byiza na ndetse guhitamo umutwe nyuma yo gutegura inkuru.

4. Amashusho n'amafoto mu nkuru y'ikinyamakuru

Inkuru y'ikinyamakuru iherekezwa n'amashusho ndetse n'amafoto kugira ngo bishimangire ihame ry'ibivugwa mu nkuru igihe biri ngombwa. Akenshi hakoreshwa amafoto agaragaza ibivugwa. Ariko hashobora no gukoreshwa amashusho y'ubugeni, arimo asekeje yo gushushanya abantu bakurikije ibitekerezo byabo, amakosa yabo cyangwa bagambiriye kubanenga mu buryo ubu n'ubu.

Akamaro k'amafoto n'amashusho mu nkuru:

Akurura abasomyi.

Agaragaza ukuri kw'ibivugwa.

Iyo uyasesenguye ubwayo aba afite ubutumwa agaragaza bwiyongera ku bivugwa mu magambo. Ubu ndeste hari ikoranabuhanga rituma ifoto y'umuntu bayihindura

uko bashatse, bakamwerekana yarakaye byacitse, aseka yishimye, ababaye arira, yambaye mu buryo ubu n'ubu, ari kumwe n'umuntu uyu n'uyu, kandi atari ko bamufotoye ameze. Ni yo mpamvu itangazamakuru ridatana n'ubugeni mu byo gutunganya amashusho n'amafoto.

Umutwe wa 9: Ububi bw'ibiyobyabwenge

Inkuru ishushanyije

1. Inshoza y'inkuru ishushanyije

Inshoza: inkuru ishushanyije ni ingeri y'ubuvanganzo bushushanyije yo mu rwego w'imyandiko mbarankuru itambutsa ubutumwa hakoreshejwe ibangikanywa ry'imvugo n'amashusho.

2. Ibiranga inkuru ishushanyije

Inkuru ishushanyije iba igizwe n'amashusho n'amagambo biri ku mpapuro zikurikirana. Buri rupapuro ruba rugizwe n'utuzu dutandukanye, turimo amashusho n'amagambo.

- Amagambo yo mu nkuru ishushanyije ashwirwa na yo mu tuzu dushobora guhabwa amashusho atandukanye: uruziga, mpandanye, urukiramende, ... ariko buri gihe tukagira akagobe kagana kuri nyiri ukuyavuga.

Inkuru ishushanyije ikoresha cyane inyiganamajwi, zigaragaza urusaku rutandukanye rutewe n'abantu cyangwa ibintu.

Amashusho ashwirwaho ibimenyetso bigaragaza ibiyumvo by'abakinnyi, n'uburyo binyagambura.

3. Zimwe mu ngingo zitabwaho mu guhanga inkuru ishushanyije

Guhanga inkuru ishushanyije bisaba gutekereza ku kiri bukinwe nk'inkuru, ku bakinnyi, aho bibera, n'igihe bibera, hanyuma ukanabishushanya.

Amashusho agomba kuba agaragaza ibigenda biba, naho ubundi byagusaba gushyiramo magambo menshi yo kubisobanura bikabangamira umusomyi.

Ni ngombwa kugenda ukoresha utwandiko duto kandi turimo amagambo akoreshwa mu mvugo kurusha akoreshwa mu nyandiko.

Guhuza amagambo n'ishusho ya nyir'ukuyavuga birakenewe cyane kugira ngo ishusho igaragaze imyitwarire n'imiterere ya nyir'ukuvuga. Itondere imyandikire kuko mu nkuru ishushanyije, amakosa agaragara cyane mu twandiko duto tuyigize: inkuru ishushanyije igira amagambo make kuko ibindi bigaragarira mu mashusho y'abakinnyi.

Ipfundo ry'inkuru

Kimwe n'ibindi bihangano mbarankuru, inkuru ishushanyije ishingira ku mimerere itameze neza mu ntangiriro, hanyuma ikagenda yerekana uko byagiye bigana ku ikemuka mu mpera. Ugomba gukora ku buryo umusomyi yifuza kumenya uko byarangiyeye. Genda uhindura uruherekane rw'ibikorwa bigize inkuru kuko kubibara umujyo umwe byarambira umusomyi.

Abakinnyi

Uko ushushanya abakinnyi bifite byinshi bisobanura mu nkuru: indoro, imiterere y'imisatsi n'uburyo bwo gusokoza, imikaya, imyambarire,...

Urubuga

Uko ugaragaza urubuga bisobanura byinshi mu nkuru ishushanyije. Bishobora kugaragaza ko abakinnyi bari mu rugo, mu muhanda, mu ndege, mu buriri, mu ishyamba, ...

Igihe

Igihe ibivugwa byabereye kigaragazwa n'amabara cyangwa ibimenyetso. Ushobora gushushanya umwijima ukoresheje ibara ry'umukara, umuseso ukoresheje ikimenyetso k'izuba rirasa (ritukura n'imirasire yaryo),

...

Iyiganteruro: Ibice by'interuro

1. Ruhamwa na ruhamya

- Ruhamwa ni ijamba ricirwa igikorwa. Rishobora kuba ari rimwe, cyangwa rifite andi ariherekeje. Muri icyo gihe ryitwa itsinda rya ruhamwa.
- Ruhamya ni inshinga (itondaguye) ubutumwa bw'interuro bushingiyeho hamwe n'ibyuzuzo byayo.

Amoko ya ruhamwa

Habaho amoko atatu ya Ruhamwa

a) Hari ruhamwa ihita igaragara mu nteruro, inoroshye kuyitahura (interuro 1, 2, 3, 4, 5). Iyo ruhamwa bayita “**Ruhamwa mboneranteruro**” kuko iba yigaragaza. Ni yo iba igenga interuro ikanashingirwaho isanisha ryose.

Ingero

Abana beza bubaha ababyeyi babo.

Icyayi k'imusozi kiraryoha.

b) Hari ruhamwa iza inyuma y'inshinga, kandi ntigenge isanisha (interuro ya 6). Iyo ruhamwa yitwa “**Ruhamwa nyurabwenge**” kuko kuyitahura bisaba gutekereza byimbitse ukareba ukora igikorwa uwo ari we, ndetse ukagomba gusa n'uyicurukura. Urugero: Imboga zibona abana. Wakwibaza uti:” Ese imboga zirareba?” Ahubwo bashatse kuvuga ngo “abana ni bo babona imboga”, cyangwa “imboga zibonwa n'abana” **Ruhamwa nyurabwenge** ni ijamba ricirwa igikorwa cyangwa imimerere ariko ritagenga isanisha.

Ingero

- **Imboga zibona abana:** Abana ni bo babona imboga.

- **Iyi fu yaseye umuhanga:** Umuhanga ni we waseye ifu.

Hari kandi ruhamwa y'inshinga yatondaguwe muri ngenga ya gatatu, igashingira ku gicumbi-ri. Yitwa “**ruhamwa mburabuzi**”.

Ingero

- **Iyo ari zo zije zitaha zabira. Ntibavuga:** Iyo ziri zo zije zitaha zabira.

- **Nabonye ari inka atari imbogo. Ntibavuga:** Nabonye ziri inka zitari imbogo.

Indi **ruhamwa mburabuzi** ishingiyeye ku nyibutsanteko ikoreshwa mu nshinga z'inshoberamahanga mu nteko ya 12, no mu nteko ya 16. Iyo ruhamwa igenga isanisha ariko itagaragara.

Ingero

- **Karahanyuze, karabaye.** Ni agaki? Ni akantu.

- Habayeho umugabo.

- Habanabakize.

- Hazatura umuhanga.

- Haraza abantu benshi.

- Habuhazi.

2. icyuzuzo

1. Inshoza y'icyuzuzo

Icyuzuzo n'ijambo cyangwa itsinda ry'amagambo aherekera inshinga akuzuzura igitekerezo cyayo. Habaho icyuzuzo mbonera, icyuzuzo nziguro, icyuzuzo k'ingereka.

Icyuzuzo mbonera

Icyuzuzo mbonera ni icyuzuzo gikurikira inshinga kitagombye kunyura ku rindi jambo.

Ingero

- Busingo akunda umugati.
- Ndashaka ikiza
- Yahaye umwana amata

2. Amoko y'ibyuzuzo mbonera

a) icyuzuzo mbonera kibamo ibice bibiri

Hari ikibonezwaho igikorwa: Kitwa ntega; haba n'ikifashishwa kugira ngo igikorwa kigerweho: cyitwa ntegesha.

Icyuzuzo mbonera ntega

Icyuzuzo mbonera ntega gisubiza ibibazo:

- **Nde?:** Ukunda nde?
- **Iki?:** Mwariye iki?
- **Ngahe?:** Utunze inka zingaha?
- **Gukora iki?:** Agiye gukora iki?

b) icyuzuzo mbonera ntegesha

Akenshi kijyana n'icyuzuzo ntega, ni rimwe na rimwe gishobora kugenda cyonyine. icyuzuzo ntegesha kivuga:

- icyo igikorwa kigenerwa: Umubyeyi ahaye **umwana** umugati.
- icyo bifashisha: Akubise impyisi **inkoni**
- icyo icyuzuzo ntega giteganyirijwe: Gushinga umurimo **umuntu**.
- icyo batanga kugira ngo icyuzuzo ntega kiboneke: Gukwa umukobwa **amafaranga**.
- icyo icyuzuzo ntega kibereye umutungo: Guha **umuntu** inka.
- icyo icyuzuzo ntega kiriho: Hanagura umwana amarira **ku matama**.

Ikitonderwa

Mu isesenguranyeruro ntutuzatandukanya icyuzuzo ntega na ntegesha, byombi tuzabyita icyuzuzo mbonera tubitandukanya n'icyuzuzo nziguro.

b) icyuzuzo nziguro

Gisobanura ingiro kivuga uko igikorwa cyangwa imimerere biba, aho bibera, igihe bibera, inshuro biba n'ibindi.

Habaho icyuzuzo nziguro cy'uburyo, icy'ahantu, icy'inshuro, icyunga n'ikigereranya.

Icyuzuzo nziguro cy'uburyo

Ingero

- Kugenda **amaterekamfizi**.
- Gukora **mu ibanga**.
- Gusenga Imana **udatuza**.
- Kwiruka **amasigamana**.

- Ryama **wubamye**.

Icyuzuzo nziguro cy'ahantu

Ingero

- Batuye i **Rusizi**
- Abakirisitu basengera **mu Kiriziya no hanze**.
- Muba **ahantu heza**.

Icyuzuzo nziguro k'igihe

Ingero

- **Ejo** twari i Nayirobi (Nairobi)
- Ndaza **nimugoroba**

Icyuzuzo nziguro k'inshuro

Ingero

- Turya **inshuro eshatu ku muni**
- Twaganiriye **kenshi**
- Ni **ubwa gatatu** yiyamamaza ntatorwe.

Icyuzuzo nziguro cyunga

Ingero

- Utahe **na** ntashya.
- Guca ukubiri **no** gucumura.
- Ukarabe **no** ku birenge.

Icyuzuzo nziguro kigereranya kijyana buri gihe n'icyungo nka.

Ingero

- Yitwara **nk'umusinzi**.
- Kora **nk'uko wabyize**.
- Agaragara **nk'umunyabwenge**.
- Yahengereye **nko mu museso** arigendera.

3. Ibyuzuzo by'ingereka (-an-, -w- , -ish- n'izindi)

Ni ibyuzuzo bizanwa n'uko ingereka yiyongereye ku nshinga cyangwa se ibyuzuzo bituma inshinga igira ingereka.

Ingero

- Ingoma zivugira umwami.
- Ahingisha majagu.
- Guhungana ihubi.
- Agasaza kamwera akandi kuzakamwa.
- Yigana terefone ku ishuri.

Ikitonderwa

- **Hari ingereka zimwe na zimwe zizana icyuzuzo kibanjirijwe n'icyungo.**

Ingero

- Uyu murima uhingwa na Karisa.
- Mugabo yigana na Gatabazi.

- **Izindi ngereka ntizitwereza ibyungo.**

Ingero

- - Nyirarukundo yandikiye Rukundo.
- - Kuvomesha urutete.
- - Ikinyarwanda kigika neza.
- Kanaburenge agendesha amaboko.
- Inka zatashye kare.

10

Umutwe 10: Uburezi n’uburere

Iyiganteruro

Isanisha

a) Inshoza y’isanisha

Isanisha ni ihuza ry’amagambo mu irema ry’interuro akajyana yose ku buryo butunganye. Iyo isanisha ritakozwe neza, interuro iba ikocamye bigatuma ubutumwa budatambuka uko bikwiye kuko abenerurimi bo baba bumva uvuga aba asa n’aho atazi neza ururimi avuga cyangwa yandika.

Ingero

- Umushyitsi muhire araturugendereye tumuzimanire.
- Abasore banini barahuye barahoberana maze barishima.

Muri izi nteruro uko ari ebyiri harimo amagambo agenga indangasano z’amagambo yandi bifitanye isano ari yo bita “amagambo ngengasano”. Mu nteruro ya (1) ijambo ngengasano ni “umushyitsi”, mu nteruro ya (2) ni “abasore”. Amagambo afitanye isano n’ijambo gengasano yisanisha na ryo maze agafata indangasano ituma ajyana n’iryo jambo mu nteruro cyangwa mu bice byayo nuko buri jambo rikisanisha na ryo ku giti cyaryo. Bityo interuro ikozwe ikaba itunganye.

b) Isano iri hagati y’amagambo mu nteruro

Ruhamwa: ni ijambo cyangwa urujyano rw’amagambo bigenga interuro rikanashingirwaho isanisha ry’andi magambo biri kumwe muri iyo nteruro.

Inshinga: inshinga ni yo igaragaza igikorwa, imimerere cyangwa imiterere ya ruhamwa ikanaheka ibyuzuzo biri mu nteruro.

Icyuzuzo: ni ijambo cyangwa urujyano rw’amagambo bivuga icyo imimerere cyangwa igikorwa cya ruhamwa byerekejweho, uburyo cyangwa inshuro biba, ahantu cyangwa igihe bibera. Icyuzuzo gishobora kandi kugaragaza ikiyongereye kuri ruhamwa cyangwa kugira ikigereranyo na yo.

c) Isanishantego mu nteruro

Isanishantego ryiga uko amagambo ahindura intego yisanisha mu rwego rw’intego n’andi bihuriye mu nteruro; iryo hindurantego rikajyana kandi n’igitekerezo uvuga afite. Ibyo bigaragarira cyane mu

itondaguranshinga. Amagambo yisanisha ni inshinga, ntera, ingirwanshinga, izinantera n'ikinyazina. Ayo magambo agenda yisanisha n'izina hakurikijwe inyito rusange cyangwa inyito bwite y'ijambo.

d) Inzira zitandukanye z'isanisha mu nteruro

1. Isanisha rigengwa n'inyito rusange y'ijambo

Bene iri sanisha usanga muri rusange rigengwa n'inteko y'izina ryisanishwaho n'andi magambo. Iri sanisha rigaragara mu nteruro ifite ijambo rimwe cyangwa menshi yibutsa inyito eshatu z'ibanze mu Kinyarwanda: Umuntu/abantu, ibindi biremwa n'ibitekerezo (ikintu/ibintu) n'umwanya n'igihe (ahantu/igihe). Ni isanisha rigaragaramo ingeri nyinshi zitandukanye, muri zo twavuga.

2. Isanisha rigengwa n'izina ridafite interurajambo

Izina rigenga isanisha riba rishobora kuvuga umuntu cyangwa ikintu. Iri sanisha rikorwa hakurikijwe inteko y'izina andi magambo agenda yisanishaho.

Ingero

- **Umuntu** munini arahinga.
- **Abantu** banini barahinga.
- **Dodo** imwe iraryoha.
- **Dodo** nyinshi ziraryoha.
- **Igiti** kinini kiratemwa.
- **Ibiti** binini biratemwa.

3. Isanisha rigengwa n'izina saa

Isanisha ry'amagambo ari mu rujyano rw'izina saa rishingira ku mubare w'amasaha.

Ingero

- **Saa** moya irageze.
- **Isaa** saba zirageze.
- **Isaha** ya saa saba irageze.

4. Isanisha rigengwa n'amazina ahujwe n'icyungo

Iyo amazina agenga isanisha ahujwe n'icyungo, isanisha rijya muri ngenga ya 3 y'inteko ya 2. Naho iyo amazina agenga amasano agizwe n'abantu n'ibintu cyangwa ibindi bintu bisa, isanisha rijya muri ngenga ya 3 y'inteko ya 8.

Ingero

- **Umwana** na se barasa.
- **Umwana** n'igitoki biraguye.
- **Inzara** n'inyota biranyishe.
- **Iyi nka** n'iki gitebo biragurishwa.

5. Isanisha rigengwa n' ikinyazina ngenga

Iyo isanisha rishingiye ku binyazina ngenga byo muri ngenga ya 1 n'iya 2, isanisha rikorwa nk'uko izina umuntu / abantu risanzwe ryisanisha, naho isanisha ry'inshinga rigakurikiza indangasano za ruhamwa zo muri ngenga ya 1 n'iya 2.

Ingero

- **Nge munini ndagaragara.**
- **Wowe muto uragaragara.**
- **Twe banini turagaragara.**
- **Mwe bato muragaragara.**

6. Isanisha rigengwa n'imbundo cyangwa inyangingo

Iyo imbundo n'inyangingo biba bifite inshoza y'ibintu, isanisha rikorwa mu nteko ya munani. Naho iyo imbundo ifashwe nk'izina, isanisha rikorwa mu nteko ya cumi na gatanu.

Ingero

- **Korora birarushya.** (nt.8)
- **Wigisha umwana bikamugirira akamaro.** (nt.8) - **Kugenda cyane bitera kubona.** (nt.8)
- **Gutandukana n'inshuti kurababaza.** (nt. 15)

7. Isanisha rigengwa n'imigereka

Inege zimwe z'imigereka zigenga amasanisha ashingiye ku nteko zikomokaho.

Ingero

- **Kera kabaye aba araje.**
- Ageze **kure kubi.**
- Muragahinga **keru keza Imana.**
- **Abikoze kabiri gasa.**

8. Isanisha rigengwa n'izina rifite akabimbura -nya

Igice cya kabiri k'izina rifite akabimbura -nyagishobora kugenga isanisha ry'amagambo gisobanura.

Urugero

- Umunyagisaka k'imigongo.
- **Ubunyabungo bwa ruguru.**

9. Isanisha rigengwa n'igice cya kabiri k'izina ry'inyunge

Igice cya kabiri k'izina ry'inyunge gishobora kugenga isanisha iyo amagambo yisanisha agisobanura.

Urugero

Umugira (i)neza imurenza impinga.

10. Isanisha rigengwa n'inyito bwite y'ijambo

Bene iri sanisha rikorwa hashingiye ku nyito y'ijambo ryisanisha cyangwa inyito uvuga ashaka gushimangira, ntabwo riba rishingiye ku nteko y'iryo jambo. Iri sanisha rigaragaramo ingeri nyinshi zitandukanye, muri zo twavugaga:

Isanisha rigengwa n'izina rikomatanya

Rikorwa mu nteko y'icyo iryo zina uvuga yahisemo mu byinshi rikomatanya.

Ingero

- Urukatsa bariruka (abantu).
- Urukatsa ziriruka (ingabo).
- Urukatsa ruriruka (agatsiko k'abantu).
- Rubanda babimenye (abantu).
- Rubanda yabimenye/rwabimenye (imbaga, itsinda).

11. Isanisha rigengwa n'izina ritazwi

Mu nteko ya 11 hari izina ritazwi rigenga isanishwa ry'inshinga zimwe na zimwe zifite inyito yo kwangana.

- Imbwa n'injangwe **rurageretse**.
- Abajura n'abayobozi **ntirujya** imbizi.
- Ababyeyi bawe n'abaturanyi **rurageretse**.

12. Isanisha ry'ingobe

Ben e iri sanisha riba kabiri mu nteruro imwe. Irya mbere riba rigenga ibinyazina ngenera naho irya kabiri rikagenga andi magambo yo muri iyo nteruro.

- Nyina **w'**iyi nka irarwaye.
- Se **w'**iki kimasa yari inkungu.
- Haruguru **yawe hari** umuntu.

13. Isanisha rigengwa n'amazina bwite

Iyo interuro igengwa n'izina bwite risanzwe, indangasano yaryo igenga isanisha ry'ikinyazina ngenera kirikurikiye, andi magambo akisanisha na ryo hakurikijwe inyito rusange cyangwa inyito bwite.

- Muvunyi **wa** Mutemura ni **munini**.
- Karyabwite **ka** Ryumugabe **rya** Munanira **wa** Masabo.
- Byavu bya Mureganshuro azagaruka ejo.

Ikitonderwa

Iyo izina bwite ari izina nteruro ridafite interurajambo, isanishwa ry'ingenera riba mu nteko ya gatanu, igice cy'interuro gisigaye kigasanishwa n'inshoza rusange.

Ingero

- Simbizi rya Rutambambuga atuye i Kigali.
- Hitayezu rya Semavugo ndamubona.

Iyo izina bwite ari izina nteruro rifite interurajambo, isanishwa ry'ingenera rijya mu nteko y'iyi nterurajambo, igice gisigaye cy'interuro kikagengwa n'inyito rusange.

- **Barayorera ba** Rwego aravuzza ubuhaha.
- **Buriminyundo bwa** rukabukira azaza ejo.
- **Rugiramahe rwa** Rujugira yakundaga amirire.

14. Isanisha ry'amazina bwite atangirwa n'akabimbura

Iyo amazina bwite atangirwa n'akabimbura, isanisha ryayo na ntera cyangwa n'ibinyazina rigengwa n'indanganteko yaryo, iry'inshinga rikagengwa n'inyito rusange.

- Nyakabwa **ka** ...
- Nyirakimonyo **cya** ...
- Sebatware **ba** ...
- Nyirashyano **rya** ...

15. Isanisha rigengwa n'indangahantu cyangwa umugereka w'ahantu

Iyo isanisha rigengwa n'indangahantu, ikinyazina ngenera gisanishwa n'izina riri kumwe n'iyi ndangahantu naho ikindi gice k'interuro kigasanishwa mu nteko ya 16. Umugereka w'ahantu wisanisha mu nteko ya 16.

- Ku rugo rwawe haragaragara.

- Mu gutwi kwahe harari umwanda.
- I Rubona rwa Ngunda harera cyane.
- Ruguru y'inzu hari injangwe.
- Hirya yawe hazakuburwe.

16. Isanisha rigengwa n'interuro ihamagara

Mu nteruro ihamagara isanisha ry'ikinyazina ngenga n'iry'inshinga rikorwa muri ngenga ya kabiri naho iry'amagambo asigaye rikagengwa n'inteko y'izina.

- Wa mwana we uri **mubi**.
- Wa ntama we uri **mbi**.
- Wa rwana we uri **rubi**.

➤ Hari igihe isanisha ryose ry'interuro rigengwa n'ikinyazina mpamagazi

Wa ntama we uri mwiza nzakugurisha amafaranga menshi unkize.

Ikitonderwa

Ingirwanshinga yisanisha nk'uko inshinga yisanisha.

Ntibavuga ngo	Bavuga ngo
Wabigenje gute?	Wabigenje ute?
Babikoze gute?	Babikoze bate?
Yabimenye gute?	Yabimenye ate?
Iki giti kimeze gute?	Iki giti kimeze gite?
Ibi biryo byamenetse gute?	Ibi biryo byamenetse bite?

Imimaro y'amagambo mu nteruro yoroheje

a) Inshoza y'imimaro y'amagambo mu nteruro

Buri rurimi rugira uburyo bwihariye bwo gukurikiranya amagambo mu nteruro kugira ngo interuro ibe iboneye. Iyo umuntu uvuga yitaje ubu buryo arema interuro ikocamye cyangwa itumvikana n'iyi yaba akoresheje amagambo anozze. Haba n'ubwo interuro ihindura igisobanuro. Mu Kinyarwanda, muri rusange ijambo risobanura irindi (imfutuzi) rirarikurikira. icyakora ikinyazina nyereka, ikinyazina kibaza, ndafutura n'akajambo "buri" bibanziriza ijambo bisobanura:

- Izo ntore zakoraga imihamirizo y'amoko yose.
- Zakoraga yose y'amoko intore izo imihamirizo. (irakocamye)
- Bateraniraga mu nzu imwe, bakahaherwa inzoga.
- Inzoga imwe nzu bateraniraga mu bakahaherwa. (irakocamye)
- Buri nkoko iri iwabo ishonda umukara.
- Inkoko buri ishonda umukara iwabo iri. (irakocamye)
- Ishonda inkoko umukara iwabo iri buri. (irakocamye)

Mu nteruro isanzwe higaragazamo ibice bibiri: ruhamwa (itsinda rya ruhamwa), na ruhamya (itsinda rya ruhamya). Buri gice (itsinda) gishobora kugabanywamo ibindi bice bito biturutse ku mimaro y'amagambo akigize.

Imimaro y'amagambo ishingira ku gusobanura, guhuza, kwerekezaho igikorwa, igihe gikorwa, aho kiri, gikorwa cyangwa kibera, kwerekana imiterere, uburyo cyangwa imimerere, inshuro...

b) Imimaro y'ingenzi y'amagambo mu nteruro ni iyi ikurikira:

• Ruhamwa

Ruhamwa ni ijambo ryitirirwa igikorwa cyangwa imimerere. Amagambo ashobora kuba ruhamwa ni:

- **Izina:** Imbeba irya umuhini yototera isuka.
- **Ikinyazina:** Umwe aya bihora.
- **Izina ntera:** Irigoyi ryica kurusha irirundi.
- **Imbundo:** Gukunda birashimisha.
- **Ikinyanshinga:** Utabusya abwita ubumera.
- **Umugereka:** Kera kabaye araza.
- **Urujyano rw'amagambo:** Ku kwezi ntihaba umwuka.

• Inshinga cyangwa izingiro ry'interuro

Tugira inshinga yuzuye: Kurya, kuryama, gukina n'izindi,

Tugira inshinga nkene / mburabuzi: -fit-(kugira), -ri-, ni (kuba)

Tugira ingirwanshinga: -ti-

- **Icyuzuzo:** Kuzuzwa, iki gishobora kuba igikorwaho igikorwa, imimerere ya ruhamwa cyangwa aho iherereye, igihe igikorwa cyabereye n'ibindi.

Imimaro mito y'amagambo mu nteruro ni:

• Imfutuzi

Imfutuzi cyangwa insobanuzi ni ijambo ryose risobanura izina cyangwa irisobanura amagambo yo mu bwoko bw'ashobora gusimbura izina, cyangwa irisobanura umugereka. Ijambo risobanura irindi rishobora kuba ari ijambo risanishwa cyangwa ridasanishwa.

Amagambo asanishwa ashobora kuba imfutuzi:

- Andika ibintu **bisomeka**.
- Amazi **anyobwa** nta bara agira.
- Umusozi **muremure**.
- Uriya **umwe** nagende.

Amagambo adasanishwa ashobora kuba imfutuzi:

- Umukara **tsiriri**.
- Amazi **buzi**.
- Inzovu **rubunga**.
- Intare **rutontoma**.
- Impyisi **mahuma**.
- Umuco **karande**.
- Inzira **nyabagendwa**.
- Inyaga **gahembe**.

• Impuza

Ni ijambo rihuza ayandi cyangwa rihuza inyangingo. Amagambo ashobora kuba impuza ni aya:

a) **Ibyungo**

- Gahigi na Kalisa barakundana.
- Ndabyumva nk'uko ubyumva.

b) **Ingirwanshinga**

- Ubabwire uti: "Nimusigeho gukubagana".
- Ubikore utyo.
- Ameze ate?
- Aha ni wowe wahagize utya?

c) **Indangahantu**

- Ngiye mu nzu.
- Atuye ku Ijwi.
- Arashaka kujya i Bugande.

d) **Urujyano rw'amagambo**

- Kubera ko, kugira ngo, ku mpamvu z'uko...

e) **Andi magambo ashobora kuba impuza:**

- Akunda nyina **kurusha** se.
- **Ahubwo** nimuze hano.

f) **Ututemajambo tw'inshinga tumwe na tumwe tugira umumaro nk'uw'impuza:**

- Ararya **akaryama**.
- Uzarima **unatere**.

Ikitonderwa

- icyo twise imimaro mito y'amagambo ni imimaro cyanecyane iri hagati y'ijambo n'irindi, ikaba yinjira mu mimaro y'ingenzi.

Iyo tuvuze ngo "umutwe umwe ntiwigira inama nziza". Ijambo "umwe", risobanura ruhamwa, bityo na ryo rikaba riri mu itsinda rya ruhamwa. Bityo rero imimaro y'ingenzi amagambo agira mu nteruro ituma

yigabanyamo amatsinda atatu y’ingenzi ari yo:

Ruhamwa, izingiro (inshinga) n’icyuzuzo. Imimaro mito ni imfutuzi cyangwa insobanuzi n’impuzo.

3. Interuro yoroheje

1. Inshoza y’interuro yoroheje

Interuro yoroheje bita iy’inyabumwe ni interuro ifite inshinga imwe itondaguye yumvikanisha ubutumwa bumwe, budasobekeranye.

- Ngwino.
- Uyu mwana azagenda imitego.
- Ndakakwambura!
- Ugiye he?
- Urugori barukoresha imikebyo migari y’ibikenyeri by’amasaka n’imitamu y’insasanure cyangwa urumamfu.

2. Gusesengura interuro yoroheje

Mu gusesengura, interuro hari inzira nyinshi zishobora gukoreshwa ariko iz’ingenzi ni izi zikurikira:

a) Imisesengurire isanzwe

Ni imisesengurire igaragaza ibice bitatu bigize interuro: **Ruhamwa, inshinga n’icyuzuzo.**

Urugero	Abana bagiye ku ishuri.
Ruhamwa	Abana
Inshinga	Bagiye
Icyuzuzo	ku ishuri

b) Imisesengurire ya ruhamwa n’imvugaruhamwa cyangwa ruhamya

Iyi misesengurire icamo interuro ibice bibiri by’ingenzi ari byo:

Itsinda rya Ruhamwa cyangwa itsinda ry’izina:

Rigizwe na ruhamwa n’imfutuzi zayo zose. Iryo tsinda ry’interuro ryerekana ukora igikorwa cyangwa uwo igikorwa gikorera. Ni Ruhamwa y’inshinga. Hashobora rero kubaho ruhamwa igizwe n’amagambo arenze rimwe, icyo gihe ni bwo bavuga ko ari itsinda rya ruhamwa.

Wa mukobwa muremure w’inzobe yiga muri Kaminuza.

(Twibuke na none ko mu Kinyarwanda hari ruhamwa nyurabwenge idahita igaragara.)

Urugero:

Imboga zibona abana. Ijambo “abana” ni ruhamwa kuko atari imboga zibona abana ahubwo ari abana bazibona.

Ruhamya cyangwa itsinda ry’inshinga:

Ni cyo bamwe bita imvugaruhamwa, kikaba ari igice k’interuro kigizwe n’inshinga n’ibyuzuzo byayo. Ruhamya itangirira ku nshinga mu nteruro kuko ari bwo baba batangiye guhamya ruhamwa uko iteye, icyo ikora. Kubera ko icyo gice kigengwa n’inshinga kitwa itsinda ry’inshinga mu gihe itari yonyine.

Urugero: Ya nka nini y’umusengo yabuze.

- Itsinda rya Ruhamwa(TS. RH.): Ya nka nini y’umusengo
- Inshinga (SH): yabuze.

Impine zikoreshwa

RH	Ruhamwa
FUZ	Imfutuzi y’icyuzuzo
SH	Inshinga
Zn	Izina
UZ	Icyuzuzo
Kzn	Ikinyazina
TS SH	Itsinda ry’inshinga
Nter	Ntera
TSRH	Itsinda rya Ruhamwa
T	Interuro
TSUZ	Itsinda ry’icyuzuzo
Grk	Ingereka:
F	Imfutuzi
IKINY	Ikinyanshinga
FRH	Imfutuzi ya Ruhamwa

Inyandiko n’ibitabo byifashishijwe

IKINYARWANDA

Igitabo cy’umunyeshuri

Amashuri yisumbuye Umwaka wa kane Ishami ry’indimi